

四庫全書

經部

欽定四庫全書

春秋分記卷六十八

宋 程公說 撰

鄭世本第一

姬姓伯爵其先出自周厲王少子宣王母弟友宣
王二十二年封友於先鄭是為桓公幽王之難寄
帑於虢鄆之間死武公滑突立是為新鄭今鄭州
新鄭縣是也

莊公

忽

厲公

昭公

忽也

子亶

子嬰

厲公後

文公

穆公

靈公

襄公

悼公

莊公

諡法勝敵克壯曰莊

名寤生武公子立二十二年魯隱元年春秋作至桓十一年卒在位四十三年

隱公經元年夏五月鄭伯克段于鄆

傳元年初鄭武公娶于申曰武姜生莊公及共叔段莊

公寤生驚姜氏故名曰寤生遂惡之愛共叔段欲立之

立為大子亟請於武公公弗許及莊公即位為之請制公曰

制嚴

五銜切又作嚴

邑也號叔死焉他邑唯命請京使居之謂

之京城大

音泰

叔祭仲曰都城過百雉國之害也

方丈曰堵三堵

曰雉先王之制大都不過參國之一中五之一小九之一

今京不度非制也君將不堪公曰姜氏欲之焉辟害對

曰姜氏何厭之有不如早為之所無使滋蔓蔓難圖也

蔓

新注此一字當為斷句

草猶不可除况君之寵弟乎公曰多行

不義必自斃子姑待之既而大叔命西鄙北鄙貳於已公子呂曰國不堪貳君將若之何欲與大叔臣請事之若弗與則請除之無生民心公曰無庸將自及大叔又收貳以為已邑至于廩延子封曰可矣厚將得衆公曰不義不暱厚將崩大叔完聚繕甲兵具卒乘將襲鄭夫人將啓之公聞其期曰可矣命子封帥車二百乘以伐京京叛大叔段段入于鄆公伐諸鄆五月辛丑大叔出

奔共書曰鄭伯克段于鄆段不弟故不言弟如二君故曰克稱鄭伯譏失教也謂之鄭志不言出奔難之也

劉敞曰段出奔共不言出奔難之也非也若段得生奔他國則鄭伯有伐弟之惡無殺弟之惡春秋但當云鄭伯伐段于鄆即解云不言出奔難之也乃可爾何有改伐為克哉傳例又曰得雋曰克若大叔奔共是不得雋何以書克此年十月傳曰共叔之亂公孫滑奔衛滑為是段子父子宜相從今於傳數

見段子不見段身蓋段見殺之後其子出奔左氏誤云段出奔爾又云如二君故曰克春秋二君相伐多矣皆曰伐不曰克不知何据而以為二君言克耶

遂寘姜氏于城潁而誓之曰不及黃泉無相見也既而悔之潁考叔為潁谷封人聞之有獻於公公賜之食食舍肉公問之對曰小人有母皆嘗小人之食矣未嘗君之羹請以遺之公曰爾有母遺繫我獨無潁考叔曰敢問何謂也公語之故且告之悔對曰君何患焉若闕月

切地及泉隧而相見其誰曰不然公從之公入而賦大
隧之中其樂也融融姜出而賦大隧之外其樂也洵洵
遂為母子如初君子曰賴考叔純孝也愛其母施
及莊公詩曰孝子不匱永錫爾類其是之謂乎

以鼓切

劉敞曰君子曰賴考叔純孝也非也莊公既自悔
其與母誓矣考叔已聞其心若此當明言曰君之
誓母不孝也鬼神所惡也雖有醜誓鬼神弗聽也
君不如迎母反之此所謂遷善徙義君子之道鬼

神所福也莊公聞若言必欣然不辭何者彼悔誓
其母左右莫能導其君者故至於此使考叔能為
此言莊公何遽不從而曖昧致說苟公不恠其舍
肉事未可知也又闕地作隧自云黃泉上之不足
誑鬼下之不足誣人內之不足欺心而徒教其君恥
過作非此孟子所謂又從而為之辭者何謂純孝乎
鄭共叔之亂公孫滑出奔衛叔段之子衛人為之伐鄭取廩
延鄭人以王師號師伐衛南鄙請師於邾

經二年冬十有二月鄭人伐衛

傳二年冬鄭人伐衛討公孫滑之亂也

經三年冬十有二月齊侯鄭伯盟于石門

傳三年鄭武公莊公為平王卿士王貳于虢鄭伯怨王

王曰無之故周鄭交質

詳見周

冬齊侯鄭伯盟于石門尋

盧之盟也

盧盟在春秋前

庚戌鄭伯之車僨于濟

既盟而遇大風蓋紀異

經四年夏宋公陳侯蔡人衛人伐鄭秋翬帥師會宋公

陳侯蔡人衛人伐鄭

傳四年衛州吁立將修先君之怨於鄭

二年鄭人伐衛之怨

使告

於宋故宋公陳侯蔡人衛人伐鄭圍其東門五日而還

秋諸侯復伐鄭敗鄭徒兵取其禾而還

經五年秋九月邾人鄭人伐宋

邾主兵故序鄭上

冬十有二月

宋人伐鄭圍長葛

傳五年夏四月鄭人侵衛牧以報東門之役衛人以燕

師伐鄭鄭祭足原繁洩駕以三軍軍其前使曼伯與子

元潛軍軍其後燕人畏鄭三軍而不虞制人六月鄭二公

子以制人敗燕師于北制君子曰不備不虞不可以師
史楠曰案僖公三十一年鄭洩駕惡公子瑕鄭伯
亦惡之公子瑕出奔楚且自隱公歷閔莊僖至此
已九十年矣而洩駕尚在洩駕鄭大夫也使九十
而在位其事當不止於兩見或二人同名耶或左
氏之誤耶

秋九月邾人鄭人以王師會伐宋入其郛以報東門之
役詳見宋冬十有二月宋人伐鄭圍長葛以報入郛之役

也

經六年春鄭人來渝平冬宋人取長葛

傳六年春鄭人來渝平更成也

師協曰鄭入春秋於隱公雖未有盟會之好然未
嘗稱兵四年秋翬帥師會四國以代之則鄭固有
憾於魯矣既而鄭從邾伐宋公初欲救以怒使者
失辭之故弗救也復思厚鄭此鄭聞之而來平歟
曰輸平者言屈損以有就也且魯嘗有伐鄭之怨

而鄭未有以報今鄭先來非有屈損而何若曰渝
平則前此未見其平又既以告絕則自此後殊無
結好之因而八年不當使宛來歸枋也是則渝平
之為輸平明矣左氏雖為更成而於字不通公穀
皆為輸而又以墮成言之意又未暢此皆無取

夏五月鄭伯侵陳大獲陳

詳見

秋宋人取長葛冬鄭伯如

周始朝桓王也王不禮焉

詳見

傳七年秋宋及鄭平冬陳及鄭平鄭公子忽在王所陳

侯請妻之鄭伯許之乃成昏

經八年春三月鄭伯使宛來歸祔庚寅我入祔

傳八年春三月鄭伯使宛來歸祔

詳見內魯

夏四月甲辰鄭

公子忽如陳逆婦媯辛亥以媯氏歸甲寅入于鄭陳鍼子送女先配而後祖鍼子曰是不為夫婦誣其祖矣非禮也何以能育 八月丙戌鄭伯以齊人朝王禮也

傳九年宋公不王鄭伯為王左卿士以王命討之伐宋秋鄭人以王命來告伐宋冬北戎侵鄭鄭伯禦之患戎

師曰彼徒我車懼其侵軼我也公子突曰使勇而無剛者當寇而速去之君為三覆以待之戎輕而不整貪而無親勝不相讓敗不相救先者見獲必務進進而遇覆必速奔後者不救則無繼矣乃可以逞從之戎人之前遇覆者奔祝聃逐之衷戎師前後擊之盡殪戎師大奔十一月甲寅鄭人大敗戎師

新注衷戎師謂師在三伏之中

經十年春王二月公會齊侯鄭伯于中丘 夏鞏帥師會齊人鄭人伐宋六月壬戌公敗宋師于菅辛未取郕

辛巳取防秋宋人衛人伐戴鄭伯伐取之冬齊人鄭人入郕

傳十年春王正月公會齊侯鄭伯于中丘癸丑盟于鄧

為師期

尋九年會于防謀伐宋

夏五月羽父先會齊侯鄭伯伐宋

六月戊申公會齊侯鄭伯于老桃壬戌公敗宋師于菅

庚午鄭師入郕辛未歸于我庚辰鄭師入防辛巳歸于

我君子謂鄭莊公於是乎可謂正矣以王命討不庭不

貪其土以勞王爵正之體也蔡人衛人郕人不會王命

不伐宋

秋七月庚寅鄭師入郊猶在郊宋人衛人入鄭

宋衛

奇兵乘虛入鄭

蔡人從之伐戴八月壬戌鄭伯圍戴癸亥克之

取三師焉宋衛既入鄭而以伐戴召蔡人蔡人怒故不和而敗九月戊寅鄭伯入宋

呂祖謙曰鄭以王命討宋得其土地當歸之王鄭何得專以與魯不臣甚矣豈可反謂之正乎

經十有一年夏公會鄭伯于時來秋七月公及齊侯鄭

伯入許

傳十一年夏公會鄭伯于邾謀伐許也鄭伯將伐許五
月甲辰授兵於大宮公孫閱與潁考叔爭車潁考叔挾
輶以走子都拔棘以逐之及大逵弗及子都怒秋七
月公會齊侯鄭伯伐許庚辰傳于許潁考叔取鄭伯之
旗螫弧以先登子都自下射之顛瑕叔盈又以螫弧登
周麾而呼火故切曰君登矣鄭師畢登壬午遂入許許莊
公奔衛齊侯以許讓公公曰君謂許不共故從君討之
許既伏其罪矣雖君有命寡人弗敢與聞乃與鄭人鄭

伯使許大夫百里奉許叔以居許東偏曰天禍許國鬼神實不逞于許君而假手于我寡人寡人唯是一二父兄不能共億其敢以許自為功乎寡人有弟不能和協而使餬其口於四方其況能久有許乎吾子其奉許叔以撫柔此民也吾將使獲也佐吾子

鄭大夫
公孫獲

若寡人得沒于地天其以禮悔禍于許無寧茲許公復奉其社稷唯我鄭國之有請謁焉如舊昏媾其能降以相從也無滋他族實偏處此以與我鄭國爭此土也吾子孫其覆

亡之不暇而況能禋祀許乎寡人之使吾子處此不唯許國之為亦聊以固吾圉也乃使公孫獲處許西偏曰凡而器用財賄無寘於許我死乃亟去之吾先君新邑於此王室而既卑矣周之子孫日失其序夫許大岳之胤也天而既厭周德矣吾其能與許爭乎君子謂鄭莊公於是乎有禮禮經國家定社稷序民人利後嗣者也許無刑而伐之服而舍之度德而處之量力而行之相時而動無累後人可謂知禮矣鄭伯使卒出殯行出

犬雞以詛射穎考叔者君子謂鄭莊公失政刑矣政以
治民刑以正邪既無德政又無威刑是以及邪邪而詛
之將何益矣王取鄆劉為刊之田于鄭而與鄭人蘇忿
生之田詳見周息侯伐鄭鄭伯與戰于竟息師大敗而還
詳見息冬十月鄭伯以虢師伐宋大敗宋師以報其入鄭
也

桓公經元年春三月公會鄭伯于垂鄭伯以璧假許田

夏四月丁未公及鄭伯盟于越

詳見內魯

經二年春三月公會齊侯陳侯鄭伯于稷以成宋亂

傳見

宋秋蔡侯鄭伯會于鄧

傳二年秋蔡侯鄭伯會于鄧始懼楚也

經五年夏齊侯鄭伯如紀 秋蔡人衛人陳人從王伐

鄭

傳五年王奪鄭伯政鄭伯不朝秋王以諸侯伐鄭鄭伯
禦之曼伯為右拒祭仲足為左拒原繁高渠彌以中軍
奉公為魚麗之陳先偏後伍伍承彌縫戰于緡葛命二

拒曰旂動而鼓蔡衛陳皆奔王卒亂鄭師合以攻之王卒大敗祝聃射王中肩王亦能軍祝聃請從之公曰君子不欲多上人況敢陵天子乎夜鄭伯使祭足勞王且問左右

傳六年夏北戎伐齊鄭太子忽帥師救齊六月大敗戎師獲其二帥大良少良甲首三百以獻於齊於是諸侯之大夫戍齊齊人饋之餼使魯為其班後鄭鄭忽以其有功也怒故有郎之師

年在十

公之未昏於齊也齊侯欲

以文姜妻鄭太子忽忽辭人問其故太子曰人各有耦

齊大非吾耦也詩云自求多福在我而已大國何為君

子曰善自為謀及其敗戎師也齊侯又請妻之

欲以他女妻之

固辭人問其故太子曰無事於齊吾猶不敢今以君命

奔齊之急而受室以歸是以師昏也民其謂我何遂辭

諸鄭伯

假父之命以為辭

呂祖謙曰北戎伐齊鄭忽救齊齊侯請妻之忽辭

其言曰自求多福在我而已大國何為此言甚善

祭仲之諫特以利害論之耳後世徒見昭公奔衛則咎其不用祭仲之言卒以無大國之助殊不知忽之敗不在此特以不能充自求多福之言耳自求多福雖以堯為父而不能與丹朱舜為子而不能與瞽瞍周公為兄而不能與管蔡況大國乎後世不可因昭公之失而廢其言也

傳七年夏盟向求成于鄭

二邑隱十年王以與鄭蘇忿生之田

既而背之

秋鄭人齊人衛人伐盟向王遷盟向之民于邾

經十年冬十有二月丙午齊侯衛侯鄭伯來戰于郎

魯

後鄭班

詳見內魯

經十有一年春正月齊人衛人鄭人盟于惡曹 夏五

月癸未鄭伯寤生卒秋七月葬鄭莊公九月宋人執鄭

祭仲突歸于鄭鄭忽出奔衛

傳十一年春齊衛鄭宋盟于惡曹鄭昭公之敗北戎也

齊人將妻之昭公辭祭仲曰必取之君多內寵子無大

援將不立三公子皆君也

子突子儀

弗從夏鄭莊公卒初

祭封人仲足有寵於莊公莊公使為卿為公娶鄧曼生
昭公故祭仲立之宋雍氏女於鄭莊公曰雍姑生厲公
雍氏宗有寵於宋莊公故誘祭仲而執之曰不立突將
死亦執厲公而求賂焉祭仲與宋人盟以厲公歸而立
之秋九月丁亥昭公奔衛己亥厲公立

趙鵬飛曰鄭莊天下巨姦脫天刑而死牖下幸矣
姜氏初愛幼子段請於武公將立之武公不從莊
公於此蓋憾其母而疾其弟也憾而疾之宜疎矣

而莊愈親之母為請京公曰諾段收二邑公不制
繕甲治兵公不詰若仁且友也而實稔其惡必克
之而後已母子兄弟之間心如丘壑尚何有於他
人宋兵圍其長葛求魯之援而告不以情要之以
利約輸祊田其實無意入祊也既魯卒俟祊入而
後出兵其謀不遂其情可見矣脅齊扳魯而入許
逐其君而疆其田乃曰許太岳之嗣也吾其能與
許爭乎攘人之地而文之以義君子信之否乎始

於魯隱有同盟之好借兵之助至隱為桓所賊莊
不能討幸可脅以責枋則為垂之會藉壁假許實
責償枋也莊公老而姦謀益深矣齊將襲紀鄭附
於齊使齊侯獨如紀則紀必疑而備之故莊助其
姦與齊俱行蓋以鄭遠於紀將致紀於不疑而成
齊襲紀之計也幸紀覺之而謀不遂不然紀國為
墟矣甚者至於帥師入于成周取麥及禾既又有
不朝之罪王師臨之鄭掃境來戰射王中肩且曰

不敢陵天子以詞飾其姦甚矣春秋書克段書輸平書入許書壁假許田書如紀書王伐鄭莊之姦情其又何逃故備論之所以發鄭莊之姦而明春秋之蘊非苟傳經也

忽

莊公世子莊公娶鄧曼生世子忽又娶宋雍氏生公子突桓十一年莊公卒忽立立四月而出經書鄭忽出奔衛不曰子言不能因先君之位也

胡安國曰忽以國氏正也出奔而名不能君也攷

於詩有女同車刺無大國之助也山有扶蘇所美
非美然擇兮君弱臣彊不唱而和也狡童不能與
賢臣圖事權臣擅命也夫以狡童目其君聖人猶
錄其詩所以見忽之失國亦其自取非蔡仲之罪
矣或曰詩人刺忽之不昏于齊至於見逐欲固其
位者必待大國之援乎曰鄭自五霸之後益以侵
削他日子產相焉馳詞執禮以當晉楚至於壞諸
侯之館垣却逆女之公子于野皆變其常度以晉

楚之彊卒莫能屈亦待大國之助乎然則仲見脅
忽出奔咸其自取焉耳春秋書法如此欲人自彊
於為善也

厲公

謚法暴慢
無親曰厲

名突莊公次子突桓十一年莊公卒忽立
宋莊公執祭仲祭仲歸立突忽奔衛明年
改元立五年桓
之十五年奔蔡

桓公經十有二年秋七月丁亥公會宋公燕人盟于穀
丘八月公會宋公于虛冬十一月公會宋公于龜丙戌

公會鄭伯盟于武父十有二月及鄭師伐宋丁未戰于宋

傳十二年公欲平宋

鄭

宋以立厲公故多責賂於鄭鄭人不堪故不平

秋公及

宋公盟于句瀆之丘

穀丘

宋成未可知也故又會于虛冬

又會于龜宋公辭平故與鄭伯盟于武父

宋公會鄭賂故與公三會

而卒辭不與鄭云

遂帥師而伐宋戰焉

經十有三年春二月公會紀侯鄭伯己巳及齊侯宋公

衛侯燕人戰齊師宋師衛師燕師敗績

傳十三年春宋多責賂於鄭鄭不堪命故以紀魯及齊與宋衛燕戰不書所戰後也鄭人來請修好

經十有四年春正月公會鄭伯于曹夏鄭伯使其弟語來盟冬十有二月宋人以齊人蔡人衛人陳人伐鄭

傳十四年春會于曹夏鄭子人來尋盟且修曹之會冬宋人以諸侯伐鄭報宋之戰也

在十年

焚渠門入及大達

伐東郊取牛首以大宮之椽歸為盧門之椽

大宮鄭祖厲王廟

劉敞曰鄭祖厲王非禮也非禮之禮其不可毀何

也曰天子固命之矣國人固奉之矣有王者作是
不可復存則已矣

經十有五年夏五月鄭伯突出奔蔡鄭世子忽復歸于
鄭秋九月鄭伯突入于櫟冬十有一月公會宋公衛侯

陳侯于袤伐鄭

袤音修

胡安國曰忽嘗嗣位君其國歸而獨稱世子則亡
其君位明矣其稱復歸者謂既絕而復歸也

傳十五年祭仲專鄭伯患之使其婿雍糾殺之將享諸

郊雍姬知之謂其母曰父與夫孰親其母曰人盡夫也父一而已胡可比也遂告祭仲曰雍氏舍其室而將享子於郊吾惑之以告祭仲殺雍糾尸諸周氏之汪公載以出曰謀及婦人宜其死也

藺敏修曰父子之合天也恩也夫婦之合人也義也恩不可廢猶義之不可廢也而曰人盡夫也父一而已不已悖哉祭仲以臣放君有所不恤無恠其子之以婦殺夫也

夏厲公出奔蔡六月乙亥昭公入秋鄭伯因櫟人殺檀伯而遂居櫟冬會于袤謀伐鄭將納厲公也弗克而還胡安國曰經於厲公復國削而不書獨書入于櫟何也夫制邑之死號君共城之叛太叔皆莊公所親戒也今又城櫟而寘子元焉使昭公不立何謀國之誤也衛有蒲城而出獻公楚有陳蔡不羹而叛棄疾未大必折有國之害也故夫子行乎季孫曰古者家不藏甲邑無百雉之城遂墮三都以張

公室於厲公復國削而不書者若曰既入于櫟則其國已復矣予以明居重馭輕彊翰弱枝以身使臂之義為天下與來世之鑒也為國者可不謹於禮乎

昭公

謚法容儀恭美曰昭

昭公世子忽也桓十一年莊公卒忽立四月出奔祭仲立厲公立五年出居櫟昭公入嗣立明年改元至十七年過弑在位二年

桓公經十有六年春正月公會宋公蔡侯衛侯于曹夏

四月公會宋公衛侯陳侯蔡侯伐鄭

傳十六年春正月會于曹謀伐鄭

前年冬謀納厲公不克故復更謀

夏

伐鄭

傳十七年初鄭伯將以高渠彌為卿昭公惡之固諫不聽昭公立懼其殺已也冬十月辛卯弑昭公而立公子亶

昭公弟

君子謂昭公知所惡矣公子達曰高伯其為戮乎復惡已甚矣

子亶

名亶莊公子昭公弟桓十七年嗣立明年
改元齊侯師于首止子亶往會齊人殺之

在位
一年

桓公傳十八年秋齊侯師于首止

陳師首止討鄭弒君子亶會之

高渠彌相

不知齊欲討已

七月戊戌齊人殺子亶而轅高渠彌

祭仲逆鄭子于陳而立之是行也祭仲知之故稱疾不
往人曰祭仲以知免仲曰信也

子嬰

名嬰字子儀莊公子子亶弟桓十八年亶
被殺于首止祭仲迎嬰于陳立之明年改

元至莊公十四年傳瑕殺
之納厲公在位十四年

莊公經四年夏齊侯陳侯鄭伯遇于垂

無傳

公說論曰杜預蘇轍皆謂此年鄭伯遇于垂者子
儀也然此當為厲公非子儀焉按春秋突歸于鄭
之後其出奔蔡入于櫟皆以名書猶繫於爵雖篡
而實君雖君而實篡不沒其實也忽雖世子其出
奔猶不得稱子其復歸猶不得稱伯以其實不能
君也而況子儀雖間得立其為君微矣豈敢輕去

國都會于外乎故知遇于垂者乃厲公也其始終書爵不沒其實也亦可以為居正而不能保者之

戒矣

趙鵬飛曰據傳所書則此遇亦非子嬰所為齊襄伐鄭問弒昭之罪臺會之為齊所執祭

仲立子嬰則祭仲固齊讎而子嬰祭仲所立敢冒不測以會耶則垂之遇必非子嬰也以聖人明鄭之世統則鄭伯亦當是突以左氏著子嬰之事則鄭伯決非子嬰傳世之統聖人重之

傳十四年夏鄭厲公自櫟侵鄭及大陵獲傳瑕曰苟舍我吾請納君與之盟而赦之六月甲子傳瑕殺鄭子及其二子而納厲公初內蛇與外蛇鬪於鄭南門中內蛇

死六年而厲公入公聞之問於申繻曰猶有妖乎對曰

人之所忌其氣燄

音艷

以取之妖由人興也人無釁焉妖

不自作人棄常則妖興故有妖厲公入遂殺傅瑕使謂

原繁曰傅瑕貳周有常刑既伏其罪矣納我而無二心

者吾曷許之上大夫之事吾願與伯父圖之且寡人出

伯父無裏言

無納我之言

入又不念寡人寡人憾焉對曰先

君桓公命我先人典司宗祏社稷有主而外其心其何

貳如之苟主社稷國內之民其誰不為臣臣無二心天

之制也子儀在位十四年矣而謀召君者庸非貳乎莊公之子猶有八人若皆以官爵行賂勸貳而可以濟事君其若之何臣聞命矣乃縊而死

八人傳唯見四子忽子廩子儀並死獨

厲公在八人名字記傳未聞

厲公後

前在位五年出居櫟在外十四年復入七年莊二十一年卒前後共在位十二年

莊公經十有五年秋鄭人侵宋

傳十五年諸侯為宋伐鄭人聞之而侵宋

詳見齊

經十有六年夏宋人齊人衛人伐鄭秋荊伐鄭冬十有二月會齊侯宋公陳侯衛侯鄭伯許男滑伯滕子同盟于幽傳十六年夏諸侯伐鄭宋故也鄭伯自櫟入緩告于楚秋楚伐鄭及櫟為不禮故也鄭伯治與音預於雍糾之

亂者九月殺公子闕則強鉏祭仲公父定叔出奔衛共叔

段三年而復之新注如書言降霍叔于庶人三年不齒曰不可使共叔無

後於鄭使以十月入曰良月也就盈數焉數滿於十君子謂

強鉏不能衛其足冬同盟于幽鄭成也

經十有七年春齊人執鄭詹鄭詹自齊逃來

傳十七年春齊人執鄭詹鄭不朝也

傳二十年春鄭伯和王室不克執燕仲父夏鄭伯遂以

王歸王處于櫟秋王及鄭伯入于鄆

鄆王所取鄭邑

遂入成周

取其寶器而還冬王子頹享五大夫樂及徧舞鄭伯聞之見號叔曰哀樂失時殃咎必至今王子頹歌舞不倦樂禍也盍納王乎號公曰寡人之願也

經二十有一年夏五月辛酉鄭伯突卒冬十有二月葬

鄭厲公

無傳八月而葬緩

傳二十一年夏鄭伯將王自圉門入殺王子頽鄭伯享

王于闕西辟

辟旁側之語

樂備

備六代之樂

王與之武公之畧自

虎牢以東

畧界也鄭武公傳平王平王賜之自虎牢以東後失其地故惠王今復與之

原伯

曰鄭伯效尤其亦將有咎

效子頽舞偏樂

五月鄭厲公卒王巡

虢守虢公為王宮于珽王與之酒泉鄭伯之享王也王

以后之鞏鑑予之虢公請器王予之爵鄭伯由是始惡

於王

為僖二十四年鄭執王使張本

文公

謚法慈惠
愛民曰文

名捷厲公子莊二十一年嗣立明年乃
改元至僖三十一年卒在位四十五年

莊公經二十八年秋荆伐鄭公會齊人宋人救鄭

傳二十八年秋楚子元以車六百乘伐鄭入于桔扶之

門諸侯救鄭楚師夜遁鄭人將奔桐丘諜告曰楚幕有

鳥乃止

詳見
楚

經二十有九年夏鄭人侵許

傳二十九年夏鄭人侵許凡師有鐘鼓曰伐無曰侵輕

曰襲

閔公經二年冬十有二月鄭棄其師

傳二年冬十二月鄭人惡高克使帥師次于河上久而

弗召師潰而歸高克奔陳鄭人為之賦清人

刺文公退臣不以道

危國亡師之本

楊時論曰觀清人之詩序可見矣文公惡高克使之將兵禦秋久而不召遂使衆散而歸豈非棄其師乎蓋惡其人而使之將兵以外之兵何罪故止

罪鄭

僖公經元年秋七月楚人伐鄭八月公會齊侯宋公鄭

伯曹伯邾人于櫜

宋地

傳元年秋楚人伐鄭鄭即齊故也盟于瑯

即櫜

謀救鄭也

經二年冬楚人侵鄭

傳二年冬楚人伐鄭闕章囚鄭聃伯

經三年冬楚人伐鄭

傳三年秋會于陽穀謀伐楚也

二年楚侵鄭故詳見齊

冬楚人伐

鄭鄭伯欲成孔叔不可曰齊方勤我棄德不祥

傳四年盟于召陵陳轅濤塗謂鄭申侯曰師出於陳鄭之間國必甚病申侯曰善濤塗以告齊侯許之申侯見曰師老矣若出於東方而遇敵懼不可用也若出於陳鄭之間共其資糧屝屨其可也齊侯說與之虎牢執轅

濤塗

詳見齊

經五年夏公及齊侯宋公陳侯衛侯鄭伯許男曹伯會王世子于首止秋八月諸侯盟于首止

公穀作首戴

鄭伯逃

歸不盟

傳五年陳轅宣仲怨鄭申侯之反已於召陵故勸之城
其賜邑曰美城之大名也子孫不忘吾助子請乃為之
請於諸侯而城之美遂諧諸鄭伯曰美城其賜邑將以
叛也申侯由是得罪秋諸侯盟王使周公召鄭伯曰吾
撫女以從楚輔之以晉可以少安

新注王恨齊桓首止之盟定太子之位故

召鄭使叛齊

鄭伯喜於王命而懼其不朝於齊也故逃歸不

盟孔叔止之曰國君不可以輕

遣政切

輕則失親失親患

必至病而乞盟所喪多矣君必悔之弗聽逃其師而歸
經六年夏公會齊侯宋公陳侯衛侯曹伯伐鄭圍新城
冬公至自伐鄭

傳六年夏諸侯伐鄭以其逃首止之盟故也圍新密
鄭所以不時城也秋楚人圍許以救鄭

經七年春齊人伐鄭夏鄭殺其大夫申侯

傳七年春齊人伐鄭孔叔言於鄭伯曰諺有之曰心則
不競何憚於病既不能彊又不能弱所以斃也國危矣

請下齊以救國公曰吾知所由來矣姑少待我

欲以申侯說

對曰朝不及夕何以待君夏鄭殺申侯以說于齊且用

陳轅濤塗之譖也初申侯申出也

姊妹之子為出

有寵於楚文

王之王將死與之璧使行曰唯我知女女專利而不厭

予取予求不女疵瑕也

從我取求我不汝咎

後之人將求多於女

求多以禮責汝

女必不免我死女必速行無適小國將不女容焉

既葬出奔鄭又有寵於厲公子文聞其死也曰古人有

言曰知臣莫若君弗可改也已秋盟于甯母謀鄭故也

鄭伯使太子華聽命於會言於齊侯曰洩氏孔氏子人氏三族實違君命君若去之以為成我以鄭為內臣君亦無所不利焉以鄭事齊如封內臣齊侯將許之管仲曰子華既為太子而求介於大國以弱其國亦必不免鄭有叔詹堵叔師叔三良為政未可間也齊侯辭焉子華由是得罪于鄭冬鄭伯使請盟于齊

傳八年春盟于洮鄭伯乞盟請服也

經十有四年秋狄侵鄭

無傳

傳十六年冬十一月乙卯鄭殺子華

傳十八年春鄭伯始朝于楚

十七年齊桓卒無霸故

楚子賜之金

既而悔之與之盟曰無以鑄兵故以鑄三鐘

經二十有二年夏宋公衛侯許男滕子伐鄭

傳二十二年春三月鄭伯如楚夏宋公伐鄭

襄公秋八月

楚人伐宋以救鄭

經二十有四年夏狄伐鄭

傳二十四年鄭之入滑也滑人聽命師還又即衛鄭公

子士洩堵俞彌帥師伐滑王使伯服游孫伯如鄭請滑
鄭伯怨惠王之入而不與厲公爵也又怨襄王之與衛
滑也故不聽王命而執二子王怒使頹叔桃子出狄師

夏狄伐鄭取櫟

詳見周

鄭子華之弟子臧出奔宋

十六年殺子華

之好聚鵠冠鄭伯聞而惡之使盜誘之八月盜殺之于

陳宋之間君子曰服之不衷身之災也

衷猶適也

詩曰彼已

之子不稱其服子臧之服不稱也夫詩曰自詒伊戚其

子臧之謂矣夏書曰地平天成稱也

匡繆正俗曰按鵠水鳥天將雨則鳴古人以其知
天時乃為冠象此鳥之形使掌天文者冠之蓋子
臧以兄見殺故與知天文者遊聚鄭伯恐其作亂
令誘殺之

傳二十八年夏四月鄭伯如楚致其師為楚師既敗而
懼時楚敗城濮使子人九行成于晉晉欒枝入盟鄭伯五月

丙午晉侯及鄭伯盟于衡雍

經三十年秋晉人秦人圍鄭

傳三十年晉人侵鄭以觀其可攻與否秋九月甲午晉

侯秦伯

穆公也

圍鄭以其無禮於晉

文公亡過鄭鄭不禮之

且貳於

楚也晉軍函陵秦軍汜南佚之狐言於鄭伯曰國危矣
若使燭之武見秦君師必退公從之辭曰臣之壯也猶
不如人今老矣無能為也已公曰吾不能早用子今急
而求子是寡人之過也然鄭亡子亦有不利用焉許之夜
縋而出見秦伯曰秦晉圍鄭鄭既知亡矣若亡鄭而有
益於君敢以煩執事越國以鄙遠君知其難也焉用亡

鄭以陪鄰

陪益也

鄰之厚君之薄也若舍鄭以為東道主

行李之往來共其乏困君亦無所害且君嘗為晉君賜

矣許君焦瑕朝濟而夕設版焉君之所知也

晉君謂惠公焦瑕晉

河外五城之二邑

夫晉何厭之有既東封鄭又欲肆其西封若

不闕秦將焉取之闕秦以利晉唯君圖之秦伯說與鄭

人盟使杞子逢孫楊孫戍之乃還

三子秦大夫反為鄭守

子犯請

擊之公曰不可微夫人之力不及此

夫人謂秦穆公

吾其還也

亦去之初鄭公子蘭出奔晉

穆公

從於晉侯伐鄭請無與

圍鄭許之使待命於東

晉東界

鄭石甲父侯宣多逆以為

大子以求成于晉晉人許之

傳三十一年冬鄭洩駕惡公子瑕鄭伯亦惡之故公子

瑕出奔楚

經三十有二年夏四月己丑鄭伯捷卒

無傳

傳三十二年冬晉文公卒杞子自鄭使告于秦曰鄭人使我掌其北門之管若潛師以來國可得也秦師遂東

穆公

謚法布德執義曰穆

名蘭文公子妾燕姑所生文公逐群公子
蘭奔晉事晉文公甚謹因求入鄭僖三十
年晉人圍鄭鄭逆之以為大子僖三十二
年嗣立明年改元至宣三年卒在位二十
年

僖公傳三十三年秦師及滑鄭商人弦高將市於周遇

之以乘韋先

音鮮

牛十二犒師曰寡君聞吾子將步師出

於敝邑敢犒從者不腆敝邑為從者之淹居則具一日
之積行則備一夕之衛且使遽告于鄭鄭穆公使視客
館則束載厲兵秣馬矣使皇武子辭焉曰吾子淹久於

敝邑惟是脯資餼牽竭矣為吾子之將行也鄭之有原

圃猶秦之有具圃也吾子取其麋鹿以閒敝邑若何杞

子奔齊逢孫楊孫奔宋孟明曰鄭有備矣不可冀也滅

滑而還冬楚令尹子上侵陳蔡陳蔡成遂伐鄭將納公

子瑕

三十一年
瑕奔楚

門于桔枳之門瑕覆于周氏之汪

車傾

外僕髡屯禽之以獻

獻瑕以
獻穆公

文夫人斂而葬之鄆城之

下

文公經九年楚人伐鄭公子遂晉人宋人衛人許人救

鄭

傳九年春三月楚子師于狼淵以伐鄭因公子堅公子

尤及樂耳

鄭大夫

鄭及楚平公子遂會晉趙盾宋華耦衛

孔達許大夫救鄭不及楚師

經十三年冬十有二月公還自晉鄭伯會公于棐

傳十三年冬公如晉盟還鄭伯與公宴于棐子家賦鴻

鴈

義取侯伯哀鰥寡有征行之勞也

季文子曰寡君未免於此文子賦

四月

義取行役踰時

子家賦載馳之四章

小國有急

文子賦采薇之

四章

豈敢定居

鄭伯拜公答拜

傳十七年夏六月晉侯蒐于黃父遂合諸侯于扈於是

晉侯不見鄭伯以為貳於楚也鄭子家使執訊而與之

書以告趙宣子曰寡君即位三年召蔡侯而與之事君

魯文二年九月蔡侯入于敝邑以行敝邑以侯宣多之難寡

君是以不得與蔡侯偕十一月克滅侯宣多而隨蔡侯

以朝于執事十二年六月歸生佐寡君之嫡夷

歸生子家名夷

鄭大子名以請陳侯于楚而朝諸君十四年七月寡君又朝

以歲陳事十五年五月陳侯自敝邑往朝于君往年正月燭之武往朝夷也八月寡君又往朝以陳蔡之密邇於楚而不敢貳焉則敝邑之故也雖敝邑之事君何以不免在位之中一朝于襄而再見于君夷與孤之二三臣相及於絳雖我小國則蔑以過之矣今大國曰爾未逞吾志敝邑有亡無以加焉古人有言曰畏首畏尾身其餘幾又曰鹿死不擇音音小國之事大國也德則其人也不德則其鹿也鉗而走險急何能擇命之罔極亦

知亡矣將悉敝賦以待於條唯執事命之文公二年六月壬申朝于齊四年二月壬戌為齊侵蔡亦獲成於楚居大國之間而從於強令豈其罪也大國若弗圖無所逃命晉鞏朔行成於鄭趙穿公壻池晉侯女壻為質焉冬十月鄭大子夷靈公石楚為質于晉

宣公經元年秋宋公陳侯衛侯曹伯會晉師于榘林伐鄭冬晉人宋人伐鄭

傳元年宋人之弑昭公也

文十六年

晉荀林父以諸侯之師

伐宋又會諸侯于扈將為魯討齊皆取賂而還

文十五年十七

年二扈之盟皆受賂

鄭穆公曰晉不足與也遂受盟于楚秋會于

榘林以伐鄭也楚為賈救鄭遇於北林

與晉師遇

囚晉解揚

冬晉人伐鄭以報北林之役

經二年春王二月壬子宋華元帥師及鄭公子歸生戰

于大棘宋師敗績獲宋華元夏晉人宋人衛人陳人侵

鄭

傳二年春鄭公子歸生受命于楚伐宋二月壬子戰于

大棘宋師敗績

詳見宋

夏晉趙盾及諸侯之師侵鄭以報

大棘之役楚闔椒救鄭遂次于鄭以待晉師

經三年夏楚人侵鄭冬十月丙戌鄭伯蘭卒葬鄭穆公

傳三年春晉侯伐鄭及邲鄭及晉平士會入盟夏楚人

侵鄭鄭即晉故也冬鄭穆公卒初鄭文公有賤妾曰燕

姑

南燕姓

夢天使與已蘭曰余為伯儵

南燕祖

余而祖也以

是為而子以蘭有國吾人服媚之如是既而文公見之

與之蘭而御之辭曰妾不才幸而有子將不信敢徵蘭

平公曰諾生穆公名之曰蘭文公報鄭子之妃曰陳媯

鄭子文公叔父子儀漢律淫季父之妻曰報

生子華子臧子臧得罪而出誘

子華而殺之南里

僖十六年

使盜殺子臧於陳宋之間又娶

于江生公子士朝于楚楚人酖之及葉而死又娶于蘇

生子瑕子俞彌俞彌早卒洩駕惡瑕文公亦惡之故不

立也公逐群公子公子蘭奔晉從晉文公伐鄭

僖三十年石

癸曰吾聞姬姑耦其子孫必蕃姑吉人也后稷之元妃

也今公子蘭姑甥也天或啓之必將為君其後必蕃先

納之可以亢極也寵與孔將鉏侯宣多納之盟于大宮而

立之以與晉平穆公有疾曰蘭死吾其死乎吾所以生

也刈蘭而卒

靈公謚法亂而不損曰靈

名夷穆公子宣三年嗣立
明年改元遇弒在位一年

宣公經四年夏六月乙酉鄭公子歸生弒其君夷冬楚

子伐鄭

傳四年楚人獻龜於鄭靈公公子宋與子家將見子公

之食指動

第二十一

以示子家曰他日我如此必嘗異味及

入宰夫將解龜相視而笑公問之子家以告及食大夫

龜召子公而弗與也子公怒染指於鼎嘗之而出公怒

欲殺子公子公與子家謀先子家曰畜老猶憚殺之而

况君乎反譖子家子家懼而從之夏弒靈公書曰鄭公

子歸生弒其君夷權不足也

子公弒而書子家罪其懼譖而從弒君故書以首惡

君子曰仁而不武無能達也凡弒君稱君君無道也稱

臣臣之罪也鄭人立子良

穆公庶子

辭曰以賢則去疾良不

足以順則公子堅長乃立襄公襄公將去穆氏

逐群而兄弟

舍子良

以其讓已

子良不可曰穆氏宜存則固願也若將亡

之則亦皆亡去疾何為乃舍之皆為大夫冬楚子伐鄭鄭未服也

襄公

謚法辟土有德曰襄

名堅靈公庶弟宣四年嗣立明年改元至成四年卒在位十八年

宣公經五年冬楚人伐鄭

傳五年冬楚子伐鄭晉荀林父救鄭

傳六年冬楚人伐鄭取成而還

九年十一年傳稱厲之殺盡在此

鄭公

子曼滿與王子伯廖語欲為卿

二子鄭大夫

伯廖告人曰無

德而貪其在周易豐

離下震上

之離

豐上六變而為純離豐上六曰豐其

屋三歲不覲凶義取無德而大其屋不過三歲必滅亡

弗過之矣

不退三年

間一歲鄭

人殺之

傳七年鄭及晉平公子宋之謀也故相鄭伯以會冬盟

于黑壤

經九年冬楚子伐鄭晉卻缺帥師救鄭

傳九年冬楚子為厲之役故伐鄭晉卻缺救鄭鄭伯敗楚師于柳林國人皆喜唯子良憂曰是國之災也吾死

無日矣

自是晉楚交兵伐鄭十二年卒有楚子入鄭之禍

經十年夏六月晉人宋人衛人曹人伐鄭冬楚子伐鄭傳十年夏鄭及楚平諸侯之師伐鄭取成而還冬楚子伐鄭晉士會救鄭逐楚師于潁北諸侯之師伐鄭鄭子家卒鄭人討幽公之亂斲子家之棺而逐其族

四年弑君故

改葬幽公謚之曰靈

經十一年夏楚子陳侯鄭伯盟于辰陵

傳十一年春楚子伐鄭及櫟子良曰晉楚不務德而兵

爭與其來者可也晉楚無信我焉得有信乃從楚夏楚

盟于辰陵陳鄭服也厲之後

在六年

鄭伯逃歸自是楚未

得志焉鄭既受盟于辰陵又徵事于晉

十年鄭及楚平辰陵盟後徵事

晉

經十有二年春楚子圍鄭

傳十二年春楚子圍鄭旬有七日鄭人卜行成不吉卜

臨力鳩切

于大宮且巷出車吉國人大臨守陴者皆哭楚

子退師鄭人修城進復圍之三月克之入自皇門至于

達路鄭伯肉袒牽羊以逆曰孤不天不能事君使君懷

怒以及敝邑孤之罪也敢不唯命是聽其俘諸江南以

實海濱亦唯命其翦以賜諸侯使臣妾之亦唯命若惠

顧前好徼福於厲宣桓武不泯其社稷

周厲王宣王鄭所自出也鄭桓

公武公始封賢君也

使改事君夷於九縣

楚滅九國以為縣願得比之

君之惠

也孤之願也非所敢望也敢布腹心君實圖之左右曰

不可許也得國無赦王曰其君能下人必能信用其民

矣庸可幾乎退三十里而許之平潘厓入盟

楚大夫

子良

出質

鄭伯弟

夏六月晉師救鄭在敖鄆之間鄭皇戌使如

晉師曰鄭之從楚社稷之故也未有貳心楚師驟勝而

驕其師老矣而不設備子擊之鄭師為承楚師必敗

子曰敗楚服鄭於此在矣欒武子曰楚鄭親矣來勸我

戰以我卜也鄭不可從乙卯楚進師乘晉軍及昏楚師

軍於邲晉之餘師不能軍

詳見楚及晉

是役也鄭石制

子服實

入楚師將以分鄭而立公子魚臣僕叔卒未鄭殺僕叔及

子服君子曰史佚所謂毋怙亂者謂是類也詩曰亂離瘼矣爰其適歸歸於怙亂者也夫鄭伯許男如楚

經十有四年夏五月晉侯伐鄭

傳十四年夏晉侯伐鄭為郟故也告於諸侯蒐焉而還

鄭人懼使子張

穆公孫

代子良于楚

十二年子良質於楚

鄭伯如楚

謀晉故也鄭以子良為有禮故召之

有遜國之禮

成公經三年春王正月公會晉侯宋公衛侯曹伯伐鄭

夏鄭公子棄疾帥師伐許冬十有一月鄭伐許

無傳

傳三年春諸侯伐鄭次于伯牛討邲之後也遂東侵鄭

晉潁軍
深入

鄭公子偃帥師禦之使東鄙覆諸鄭敗諸丘輿

皇戌如楚獻捷夏許恃楚不事鄭鄭子良伐許

經四年春三月壬申鄭伯堅卒夏四月葬鄭襄公

無傳

鄭伯伐許

悼公

傳四年冬十一月鄭公孫申帥師疆許田許人敗諸展

陂鄭伯伐許取鉏任泠敦之田晉欒書將中軍荀首佐

之士變佐上軍以救許伐鄭取汜祭楚子反救鄭鄭伯
與許男訟焉皇成攝鄭伯之辭子反不能決也曰君若
辱在寡君寡君與其二三臣共聽兩君之所欲成其可
知也不然側不足以知二國之成

側子反名

悼公

謚法恐懼徒處曰悼

名費襄公子成四年嗣立明年改元至六年卒在位二年

成公經五年十有二月己丑公會晉侯齊侯宋公衛侯
鄭伯曹伯邾子杞伯同盟于蟲牢

傳五年夏許靈公愬鄭伯于楚六月鄭悼公如楚訟不

勝楚人執皇戌及子國

以鄭伯不直

故鄭伯歸使公子偃請

成于晉秋八月鄭伯晉趙同盟于垂棘冬同盟于蟲牢

鄭服也

經六年夏六月壬申鄭伯費卒秋楚公子嬰齊帥師伐

鄭冬晉欒書帥師救鄭


傳六年春鄭伯如晉拜成子游相

公子偃

授玉于東楹

之東士貞伯曰鄭伯其死乎自弃也已視流而行速不

安其位宜不能久夏六月鄭悼公卒秋楚子重伐鄭鄭
從晉故也晉欒書救鄭與楚師遇于繞角楚師還



春秋分記卷六十八

欽定四庫全書

經部

程氏春秋分記卷

六十九至
七十一

詳校官監察御史臣李陽樞

給事中臣溫常綬覆勘

總校官原任中任臣王燕緒

校對官主簿臣汪日贊

臚錄監生臣沈應麟

欽定四庫全書

春秋分記卷六十九

宋 程公說 撰

鄭世本第二

成公

僖公

簡公

成公

諡法安民
立政曰成

名論襄公季悼公弟成六年嗣立明年改
元二年晉執之四年三月鄭立公子縶四

月縶縶立見縶五月成公歸
至襄二年在位十四年

成公經七年秋楚公子嬰齊帥師伐鄭公會晉侯齊侯
宋公衛侯曹伯莒子邾子杞伯救鄭八月戊辰同盟于
馬陵

傳七年春鄭子良相成公以如晉見且拜師 秋楚子

重伐鄭師于汜諸侯救鄭鄭共仲侯羽

鄭大夫

軍楚師八

月同盟于馬陵尋蟲牢之盟

傳八年春晉欒書侵蔡遂侵楚楚師之還也晉侵沈鄭
伯將會晉師門于許東門大獲焉

經九年秋七月晉人執鄭伯晉欒書帥師伐鄭冬十
有一月鄭人圍許

傳九年春二月楚人以重賂求鄭鄭伯會楚公子成于

鄧秋鄭伯如晉晉人討其貳於楚也執諸銅鞮欒書

伐鄭鄭人使伯蠲行成晉人殺之非禮也兵交使在其

間可也楚子重侵陳以救鄭

陳與晉故

冬十一月鄭人圍

許示晉不急君也是則公孫申謀之曰我出師以圍許

示不為將改立君者而紓晉使

勿亟遣使詣晉示欲更立君

晉必歸

君

經十年春衛侯之弟黑背帥師侵鄭 夏五月公會晉

侯齊侯宋公衛侯曹伯伐鄭

傳十年春衛子叔黑背侵鄭晉命也 鄭公子班

子聞如

叔申之謀

改立君之謀

三月子如立公子繻夏四月鄭人殺

繻立髡頑

成公子犬子

子如奔許藥武子曰鄭人立君我執一

人焉何益不如伐鄭而歸其君以求成焉晉侯有疾五

月晉立大子州蒲以為君而會諸侯伐鄭鄭子罕賂以

襄鍾

鄭襄公之廟鍾

子然盟于修澤子駟為質辛巳鄭伯歸

不書

鄭不告

入六月鄭伯討立君者戊申殺叔申叔禽

申之弟

君子

曰忠為令德非其人猶不可況不令乎

傳十二年春宋華元克合晉楚之成夏鄭伯如晉聽成

詳見晉

傳十三年夏六月丁卯夜鄭公子班自訾求入于大宮

不能殺子印子羽

十年班出奔許今還欲為亂

反軍于市巳巳子駟

帥國人盟于大宮遂從而盡焚之殺子如

班

子駟

班弟 孫

叔子如孫知子駝

經十有四年秋鄭公子喜帥師伐許

傳十四年秋八月鄭子罕伐許敗焉戊戌鄭伯復伐許
庚子入其郛許人平以叔申之封

經十五年夏六月楚子伐鄭

傳十五年夏六月楚子侵鄭及暴隧鄭子罕侵楚取新

石

詳見楚

經十六年夏四月鄭公子喜帥師侵宋 六月晉侯使

欒黶來乞師甲午晦晉侯及楚子鄭伯戰于鄢陵楚子
鄭師敗績 秋公會尹子晉侯齊國佐邾人伐鄭

傳十六年春楚子自武城使公子成以汝陰之田求成

于鄭鄭叛晉子駟從楚子盟于武城

為晉伐
鄭起

夏四月

鄭子罕伐宋敗宋于汧陂衛侯伐鄭至于鳴鴈為晉故
也 晉侯將伐鄭戊寅晉師起鄭人使告于楚姚句耳

鄭大
夫

與往楚子救鄭六月晉楚遇于鄢陵楚師敗績

秋會于沙隨謀伐鄭也七月公會尹武公及諸侯伐鄭

詳見
晉

經十有七年春衛北宮括帥師侵鄭 夏公會尹子單
子晉侯齊侯宋公衛侯曹伯邾人伐鄭六月乙酉同盟
于柯陵 冬公會單子晉侯宋公衛侯曹伯齊人邾人
伐鄭

傳十七年春王正月鄭子駟侵晉虛滑

晉

衛北宮括救

晉侵鄭至于高氏 夏五月鄭大子髡頑侯孺為質於
楚楚公子成公子寅戍鄭公會尹武公單襄公及諸侯

伐鄭自戲童至于曲洧六月乙酉同盟于柯陵楚子重
救鄭師于首止諸侯還 冬諸侯伐鄭十月庚午圍鄭
楚公子申救鄭師于汝上十有一月諸侯還

傳十八年夏六月鄭伯侵宋及曹門外遂會楚子伐宋
取朝郟

襄公經元年夏晉韓厥帥師伐鄭仲孫蔑會齊崔杼曹
人邾人杞人次于鄆 秋楚公子壬夫帥師侵宋

傳元年夏五月晉韓厥荀偃帥諸侯之師伐鄭入其郛

敗其徒兵於洧上於是東諸侯之師次于鄆以待晉師
晉師自鄭以鄆之師侵楚焦夷及陳晉侯衛侯次于戚
以為之援 秋楚子辛救鄭侵宋呂留鄭子然侵宋取
犬丘

經二年春鄭師伐宋 夏六月庚辰鄭伯踰卒

庚辰七月九日

經書六月誤

晉師宋師衛甯殖侵鄭

秋七月仲孫蔑會晉

荀瑩宋華元衛孫林父曹人邾人于戚 冬仲孫蔑會

晉荀瑩齊崔杼宋華元衛孫林父曹人邾人滕人薛人

小邾人于戚遂城虎牢

傳二年春鄭師侵宋楚令也鄭成公疾子駟請息肩

於晉公曰楚君以鄭故親集矢於其目

鄢陵戰晉射楚王目

非異

人不為他人任寡人也若背之是弃力與言其誰曜我免寡

人唯二三子秋七月庚辰鄭伯踰卒於是子罕當國子

駟為政子國為司馬晉師侵鄭諸大夫欲從晉子駟曰

官命未改

不欲違先君意

會于戚謀鄭故也孟獻子請城虎

牢以偪鄭冬復會于戚遂城虎牢鄭人乃成

詳見晉

僖

謚法小曰僖
畏忌曰僖

名髡頑成公子襄三年嗣立明年改元至襄七年卒在位五年

襄公經五年夏鄭伯使公子發來聘

傳五年夏鄭子國來聘通嗣君也

經七年冬十有二月會于鄆鄭伯髡頑如會未見諸侯

丙戌卒於鄆

傳七年冬會于鄆鄭僖公之為太子也於成之十六年與子罕適晉不禮焉又與子豐適楚亦不禮焉及其元

年朝于晉

鄭僖元年
魯哀三年

子豐欲懇諸晉而廢之子罕止之

及將會于鄆子駟相又不禮焉侍者諫不聽又諫殺之
及鄆子駟使賊夜弑僖公而以瘡疾赴于諸侯簡公生
五年奉而立之

趙子辨疑曰諸侯死例書名此則為上文已言鄭
伯如會下不可又云鄭伯髡頑卒又不可上言鄭
伯如會下但言髡頑卒所以須於如會時便書名
以便其文耳三傳不達此體見其文特異不能釋

得妄云被殺若實見殺而以疾赴則從而書之諸國弑君豈有實告乎按經文未見諸侯則是已出境臨欲相見云耳

簡公

諡法一德不懈曰簡

名嘉僖公子襄七年嗣立明年改元至昭十二年卒在位三十六年

襄公經八年夏葬鄭僖公無傳鄭人侵蔡獲蔡公子燹

冬楚公子貞帥師伐鄭

傳八年鄭羣公子以僖公之死也謀子駟子駟先之

夏四月庚辰辟殺子狐子熙子侯子丁孫擊孫惡

二孫子狐

子出奔衛

庚寅鄭子國子耳侵蔡獲蔡司馬公子燮

鄭人皆喜唯子產不順曰小國無文德而有武功禍莫

大焉楚人來討能勿從乎從之晉師必至晉楚伐鄭自

今鄭國不四五年弗得寧矣子國

子產父

怒之曰爾何知

國有大命而有正卿童子言焉將為戮矣五月會于

邢丘鄭伯獻捷于會故親聽命冬楚子囊伐鄭討其

侵蔡也子駟子國子耳欲從楚子孔子驕子展欲待晉

待晉來救

子駟曰周詩有之曰俟河之清人壽幾何兆云詢

多職競作羅

兆卜詢謀也言既卜且謀多則競作羅網之難無成功

謀之多族民

之多違事滋無成民急矣姑從楚以紓吾民晉師至吾

又從之敬共幣帛以待來者小國之道也犧牲玉帛待

於二境以待彊者而庇民焉寇不為害民不罷病不亦

可乎子展曰小所以事大信也小國無信兵亂日至亡

無日矣五會之信

三年會雞澤五年會戚又會城棣七年會鄆八年會邢丘

今將背

之雖楚救我將安用之親我無成

晉親鄭

鄙我是欲

楚以鄭為

敝邑不可從也不如待晉晉君方明四軍無闕八鄉和睦

必不弃鄭楚師遼遠糧食將盡必將速歸何患焉舍之

子展名聞之杖莫如信完守以老楚杖信以待晉不亦可

乎子駟曰詩云謀夫孔多是用不集發言盈庭誰敢執

其咎如匪行邁謀是用不得于道小請從楚駢子駟名也

受其咎乃及楚平使王子伯駢晉大夫告于晉曰君命敝

邑修而車賦敝而師徒以討亂畧蔡人不從敝邑之人

不敢寧處悉索敝賦以討于蔡獲司馬燹獻于邢丘今

楚來討曰女何故稱兵于蔡焚我郊保馮陵我城郭敝
邑之衆夫婦男女不遑啟處以相救也翦盡也焉傾覆無
所控告民死亡者非其父兄即其子弟夫人愁痛不知
所庇民知窮困而受盟于楚孤也與其二三臣不能禁
止不敢不告知武子使行人子負對之曰君有楚命亦
不使一介行李告于寡君而即安于楚君之所欲也誰
敢違君寡君將帥諸侯以見于城下唯君圖之

經九年冬公會晉侯宋公衛侯曹伯莒子邾子滕子薛

伯杞伯小邾子齊世子光伐鄭 十有二月己亥同盟
于戲楚子伐鄭

傳九年冬十月諸侯伐鄭庚午季武子齊崔杼宋皇鄭

從荀鑿士句門于鄭門衛北宮括曹人邾人從荀偃韓

起門于師之梁滕人薛人從樂厲士魴門于北門杞人

邠人從趙武魏絳斬行栗

表道本

甲戌師于汜令於諸侯

曰修器脩盛餼糧歸老幼居疾于虎牢肆青圍鄭鄭人

恐乃行成諸侯皆不欲戰乃許之十一月己亥同盟于

戲鄭服也將盟鄭六卿公子騂

子騂

公子發

子發

公子嘉

子嘉

公孫輒

子輒

公孫薑

子薑

公孫舍之

子展

及其大夫門子

子適

子適

皆從鄭伯晉士莊子為載書曰自今日既盟之後鄭國

而不唯晉命是聽而或有異志者有如此盟公子騂趨

進曰天禍鄭國使介居二大國之間大國不加德音而

亂以要之使其鬼神不獲歆其禋祀其民人不獲享其

土利夫婦辛苦墊隘無所底告自今日既盟之後鄭國

而不唯有禮與彊可以庇民者是從而敢有異志者亦

如之荀偃曰改載書公孫舍之曰昭大神要言焉若可
改也大國亦可叛也知武子謂獻子曰我實不德而要
人以盟豈禮也哉非禮何以主盟姑盟而退修德息師
而未終必獲鄭何必今日我之不德民將棄我豈唯鄭
若能休和遠人將至何恃於鄭乃盟而還晉人不
得志於鄭以諸侯復伐之十二月癸亥門其三門閏月
戊寅濟于陰阪侵鄭次于陰口而還子孔曰晉師可擊
也師老而勞且有歸志必大克之子展曰不可

新注杜
云此年

不得有閏月癸亥去戊寅十六日疑閏月當為門五
五字上與門合為閏則後學自然轉日為月詳見晉書
楚子伐鄭子駟將及楚平子孔子矯曰與大國盟口血
未乾而背之可乎子駟子展曰吾盟固云唯彊是從今
楚師至晉不我救則楚彊矣盟誓之言豈敢背之且要
盟無質神弗臨也所臨唯信信者言之瑞也善之主也
是故臨之明神不蠲要盟背之可也乃及楚平公子罷
戎入盟同盟于中分

經十年夏楚公子貞鄭公孫轅帥師伐宋 秋公會晉

侯宋公衛侯曹伯莒子邾子齊世子光滕子薛伯杞伯
小邾子伐鄭 冬盜殺鄭公子駢公子發公孫輒戍鄭
虎牢楚公子貞帥師救鄭

傳十年夏六月楚子囊鄭子耳伐宋衛侯救宋師于襄
牛鄭子展曰必伐衛不然是不與楚也得罪於晉又得
罪於楚國將若之何子駟曰國病矣子展曰得罪於二
大國必亡病不猶愈於亡乎諸大夫皆以為然故鄭皇
耳帥師侵衛楚令也衛人追之孫蒯獲鄭皇耳于犬丘

秋七月子囊子耳侵我西鄙還圍蕭八月丙寅克之九月子耳侵宋北鄙孟獻子曰鄭其災乎師競已甚周猶不堪競况鄭乎有災其執政之三士乎 諸侯伐鄭已

酉師于牛首

鄭地

初子駟與尉止有爭將禦諸侯之師

而黜其車

減損其車

尉止獲又與之爭

獲囚

子駟抑尉止曰

爾車非禮也遂弗使獻

不使獻其所獲之俘

初子駟為田洫司氏

堵氏侯氏子師氏皆喪田焉

侵四族田

故五族聚羣不逞之

人因公子之徒以作亂

八年子駟所殺公子熙之黨

於是子駟當國

子國為司馬子耳為司空子孔為司徒冬十月戊辰尉
止司臣侯晉堵女父子師僕帥賊以入晨攻執政于西
宮之朝殺子駟子國子耳叔鄭伯以如北宮子孔知之
故不死書曰盜言無大夫焉子西子駟聞盜不儆而出

尸而追盜盜入於北宮乃歸授甲臣妾多逃器用多喪

子產聞盜

子國

為門者

置守門

庀羣司

具衆官
匹婢切

閱府庫慎

閑藏完守備成列而後出兵車十七乘

千二百七
十五人

尸而

攻盜於北宮子驕帥國人助之殺尉止子師僕盜衆盡

死侯晉奔晉堵女父司臣尉翩司齊奔宋

晁補之曰子西子駟子也子產子國子也子西之才不及子產不待此而知也均人子也盜戕其父聞難匍匐遑遽而往猶恐不及而責子西以不儆善子產以无完此豈雍容時耶傳失之矣且言國事則三執政喋血朝廷言家事則父暴尸衢巷而咎臣妾之逃悼器用之喪豈但鄙細不知務而已哉

子孔當國

代子

為載書以位序聽政辟大夫諸司門子

弗順將誅之

欲誅不順者

子產止之請為之焚書

既止子孔又勸令燒

除載書

子孔不可曰為書以定國衆怒而焚之是衆為政

也國不亦難乎子產曰衆怒難犯專欲難成合二難以

安國危之道也不如焚書以安衆子得所欲衆亦得安

不亦可乎專欲無成犯衆興禍子必從之乃焚書於倉

門之外衆而後定諸侯之師城虎牢而戍之晉師城

梧及制書曰戍鄭虎牢非鄭地也言將歸焉鄭及晉平

楚子囊救鄭十一月諸侯之師還鄭而南至於陽陵

楚師不退欒黶獨進師遂進己亥與楚師夾潁而軍子

蟜曰諸侯既有成行必不戰矣從之將退不從亦退退

楚必圍我猶將退也不如從楚亦以退之宵涉潁與楚

人盟

畏晉知之

欒黶欲伐鄭師荀瑩不可曰我實不能禦楚

又不能庇鄭鄭何罪不如致怨焉而還

致怨以爲後伐之資

丁未

諸侯之師還侵鄭北鄙而歸

欲以致怨

楚人亦還

鄭服故也

經十有一年夏四月鄭公孫舍之帥師侵宋 公會晉

侯宋公衛侯曹伯齊世子光莒子邾子滕子薛伯杞伯

小邾子伐鄭秋七月己未同盟于亳城北

一本亳作京

楚子

鄭伯伐宋公會晉侯宋公衛侯曹伯齊世子光莒子邾子滕子薛伯杞伯小邾子伐鄭會于蕭魚 楚人執鄭行人良霄

傳十一年鄭人患晉楚之故諸大夫曰不從晉國幾亡楚弱於晉晉不吾疾也晉疾楚將辟之何為而使晉師致死於我楚弗敢敵而後可固與也子展曰與宋為惡

諸侯必至吾從之盟楚師至吾又從之則晉怒甚矣晉能驟來楚將不能吾乃固與晉大夫說之使疆場之司

惡於宋

使侵犯宋

宋向戌侵鄭大獲子展曰師而伐宋可矣

若我伐宋諸侯之伐我必疾吾乃聽命焉且告於楚楚師至吾又與之盟而重賂晉師乃免矣夏鄭子展侵宋四月諸侯伐鄭己亥齊太子光宋向戌先至于鄭門于東門其莫音暮晉荀鑒至于西郊東侵舊許衛孫林父侵其北鄙六月諸侯會于北林師于向右還次于瑣圍

鄭觀兵于南門西濟于濟隧鄭人懼乃行成秋七月同盟于亳 楚子囊乞旅于秦秦右大夫詹帥師從楚子將以伐鄭鄭伯逆之丙子伐宋 九月諸侯悉師以復

伐鄭鄭人使良霄大宰石癸

勅略切

如楚告將服于晉曰

孤以社稷之故不能懷君君若能以玉帛綏晉不然則武震以攝威之孤之願也楚人執之書曰行人言使人也諸侯之師觀兵于鄭東門鄭人使王子伯駢行成甲戌晉趙武入盟鄭伯冬十月丁亥鄭子展出盟晉侯十

二月戊寅會于蕭魚庚辰赦鄭囚皆禮而歸之納斥侯
禁侵掠鄭人賂晉侯以師悝師觸師蠲廣車軌車淳十
五乘甲兵備凡兵車百乘歌鍾二肆及其鐻磬女樂
二八

程頤曰晉悼公推誠以待反覆之鄭信而不疑鄭
自是不背晉者二十四年

傳十三年冬鄭良霄大宰石彘猶在楚

十一年
執至今

石彘言

於子囊曰先王卜征五年而歲習其祥祥習則行

新注
習因

也祥善也歲因其善謂去年吉今年又吉善因則行謂五年五吉善善相因不習則增修德

而改卜今楚實不競行人何罪止鄭一卿以除其偏良霄

使睦而疾楚以固於晉焉用之使歸而廢其使怨其君

以疾其大夫而相牽引也不猶愈乎楚人歸之

傳十五年鄭尉氏司氏之亂其餘盜在宋亂在十年鄭人以

子西伯有子產之故納賂于宋三子父為尉氏所殺以馬四十乘

與師茂師慧樂師三月公孫黑為質焉司城子罕以堵女

父尉翩司齊少之良司臣而逸之賢而放之託諸季武子武

子真諸卞鄭人醢之三人也

女父尉司齊

師慧過宋朝將私

馬

私小

其相曰朝也慧曰無人焉相曰朝也何故無人

慧曰必無人焉若猶有人豈以其千乘之相易淫樂之

矇必無人焉故也

千乘相謂子產等言不為子產殺三盜得賂而歸之

子罕聞之

固請而歸之冬十二月鄭人奪堵狗之妻而歸諸范

氏

狗女父之族娶於晉范氏故奪其妻歸之

經十八年冬楚公子午帥師伐鄭

傳十八年冬十二月鄭子孔欲去諸大夫將叛晉而起

楚師以去之使告子庚

楚令尹

子庚帥師治兵於汾子蟜

伯有子張從鄭伯伐齊子孔子展子西守二子

子展子西

知

子孔之謀完守入保子孔不敢會楚師楚師伐鄭次于

魚陵右師城上棘遂涉潁次于旃然為子馮公子格率

銳師侵費滑胥靡獻于雍梁右回梅山侵鄭東北至于

蟲牢而反子庚門于純門信于城下而還涉於魚齒之

下甚雨及之

詳見楚

經十有九年秋八月鄭殺其大夫公子嘉

傳十九年於四月丁未鄭公孫蠆卒赴於晉大夫范宣

子言於晉侯以其善於伐秦也

十四年晉伐秦子蟜見諸侯師而勸之濟涇

六月晉侯請於王王追賜之大路使以行禮也 秋八

月鄭子孔之為政也專國人患之乃討西宮之難

十年尉止

作難西宮子孔知而不言

與純門之師

前年子孔召楚師至純門

子孔當罪以其

甲及子革子良氏之甲守甲辰子展子西率國人伐之

殺子孔而分其室書曰鄭殺其大夫專也子然子孔宋

子之子也士子孔圭媯之子也圭媯之班亞宋子而相

親也士子孔亦相親也僖之四年子然卒

鄭僖四年簡
魯襄六年

之元年士子孔卒

鄭簡元年
魯襄八年

司徒孔實相子革子良之

室三室如一故及於難子革子良出奔楚子革為右尹

鄭人使子展當國子西聽政立子產為卿

傳二十二年夏晉人徵朝于鄭鄭人使少正公孫僑

子產

對曰在晉先君悼公九年我寡君於是即位

魯襄八年

即位

八月而我先大夫子駟從寡君以朝于執事執事不禮

於寡君寡君懼因是行也我二年六月朝于楚

因晉不見禮

晉是以有戲之役

九年

楚人猶競而申禮於敝邑敝邑欲

從執事而懼為大尤曰晉其謂我不共有禮是以不敢

攜貳於楚我四年三月先大夫子蟜又從寡君以觀釁

於楚

實朝言觀釁飾辭也

晉於是乎有蕭魚之役

十一年

謂我敝邑

邇在晉國譬諸草木吾臭味也

晉鄭同姓

而何敢差池楚亦

不競寡君盡其土實重之以宗器以受齊盟

同盟

遂帥群

臣隨于執事以會歲終貳於楚者子侯石孟歸而討之

涇梁之明年

十六年

子蟜老矣公孫夏從寡君以朝于

君見於嘗酎

月令孟夏天子嘗酎者重釀之酒

與執燔焉間二年聞君

將靖東夏

二十七年澶淵盟

四月又朝以聽事期不朝之間無

歲不聘無役不從以大國政令之無常國家罷病不虞

荐至無日不惕豈敢忘職大國若安定之其朝夕在庭

何辱命焉若不恤其患而以為口實其無乃不堪任命

而翦為仇讐敝邑是懼其敢忘君命委諸執事執事實

重圖之

秋九月鄭公孫黑肱

子張

有疾歸邑于公召室

老宗人立段

子石黑肱子

而使黜官薄祭祭以特羊殷以少

牢足以共祀盡歸其餘邑曰吾聞之生於亂世貴而能
貧民無求焉可以後亡敬共事君與二三子生在敬戒
不在富也已已伯張卒君子曰善戒詩曰慎爾侯度用
戒不虞鄭子張其有焉 冬十二月鄭游公孫將

歸晉未出竟遭逆妻者奪之以館于邑

舍止其邑

丁巳其夫

攻子明殺之以其妻行子展廢良

子展

而立太叔

子展

曰國

卿君之貳也民之主也不可以苟請舍子明之類求亡

妻者使復其所使游氏勿怨曰無昭惡也

交怨則父之不修益明也

經二十有四年冬楚子蔡侯陳侯許男伐鄭

傳二十四年范宣子為政諸侯之幣重鄭人病之二月
鄭伯如晉子產寓書於子西以告宣子曰子為晉國四
隣諸侯不聞令德而聞重幣僑也惑之僑聞君子長國
家者非無賄之患而無令名之難夫諸侯之賄聚於公
室則諸侯貳若吾子賴之則晉國貳諸侯貳則晉國壞
晉國貳則子之家壞何沒沒也將焉用賄夫令名德之
興也德國家之基也有基無壞無亦是務乎有德則樂

樂則能久詩云樂只君子邦家之基有令德也夫上帝
臨女無貳爾心有令名也夫怨思以明德則令名載而
行之是以遠至邇安毋寧使人謂子子實生我而謂子
浚我以生乎象有齒以焚其身賄也宣子說乃輕幣是
行也鄭伯朝晉為重幣故且請伐陳也鄭伯稽首宣子
辭子西相曰以陳國之介恃大國而陵虐於敝邑寡君
是以請罪焉敢不稽首 秋會於夷儀將以伐齊冬楚
子伐鄭以救齊門于東門次于棘澤諸侯還救鄭晉侯

使張骼輔蹠致楚師求御于鄭鄭人卜宛射犬吉子大

叔戒之曰大國之人不可與也

言不可與等

對曰無有衆寡

其上一也大叔曰不然部婁

小阜

無松栢二子

張骼輔蹠

在幄

坐射犬于外既食而後食之使御廣車而行已皆乘乘

車

安

將及楚師而後從之乘皆踞轉而鼓琴近不告而

馳之

射犬恨故近敵不告而馳

皆取冑於橐而冑入壘皆下搏人以

投收禽挾囚弗待而出皆超乘抽弓而射既免復踞轉

而鼓琴曰公孫同乘兄弟也胡再不謀

謂不告而馳不待而出

對

曰曩者志入而已今則怯也皆笑曰公孫之亟也楚子
自棘澤還

傳二十五年初陳侯會楚子伐鄭當陳隧者并堙木刊

鄭人怨之夏六月鄭子展子產帥車七百乘伐陳宵突

陳城遂入之陳侯免

喪服音問

擁社

抱社主

子美入

子產

數俘而

出司徒致民司馬致節司空致地乃還

詳見陳

秋八月鄭

子產獻捷于晉戎服將事晉人問陳之罪對曰昔虞閼

父為周陶正以服事我先王我先王賴其利器用也與

其神明之後也庸以元女大姬妃胡公而封諸陳以備

三恪則我周之自出至于今是賴桓公之亂蔡人欲立

其出

蔡出厲公也
楚陳陀之亂

我先君莊公奉五父而立之蔡人殺

之我又與蔡人奉戴厲公至於莊宣皆我之自立

陳莊宣皆

厲公

夏氏之亂成公播蕩又我之自入君所知也

宣十一年

今陳忘周之大德蔑我大惠弃我姻親介恃楚衆以馮

陵我敝邑不可億逞

億度也
逞盡也

我是以有往年之告未獲

成命則有我東門之役

前年陳從楚
伐鄭東門

當陳隧者井堙木

刑敝邑大懼不競而恥大姬天誘其衷啓敝邑心陳知

其罪授手于我用敢獻功晉人曰何故侵小對曰先王

之命唯罪所在各致其辟

誅也

且昔天子之地一圻

方千里

列國一同

方百里

自是以衰

差降

今大國多數圻矣若無侵

小何以至焉晉人曰何故戎服對曰我先君武莊為平

桓鄉士城濮之役文公

晉文公

布命曰各復舊職命我文

公戎服輔王以授楚捷不敢廢王命故也士莊伯不能

詰復於趙文子文子曰其辭順犯順不祥乃受之冬

十月子展相鄭伯如晉拜陳之功子西復伐陳陳及鄭
平仲尼曰志有之言以足志文以足言不言誰知其志
言之無文行而不遠晉為伯鄭入陳非文辭不為功慎

辭哉十二月晉程鄭卒子產始知然明

前年然明謂程鄭將死今如其

言故知之

問為政焉對曰視民如子見不仁者誅之如鷹鷂

之逐鳥雀也子產喜以語子大叔且曰他日吾見蔑之

面而已

蔑然明名

今吾見其心矣子大叔問政於子產子產

曰政如農功日夜思之思其始而成其終朝夕而行之

行無越思如農之有畔其過鮮矣

經二十六年冬楚子蔡侯陳侯伐鄭

傳二十六年鄭伯賞入陳之功三月甲寅朔享子展賜之先路三命之服先八邑賜子產次路再命之服先六邑子產辭邑曰自上以下降殺以兩禮也臣之位存四且子展之功也臣不敢及賞禮請辭邑公固予之乃受三邑公孫揮曰子產其將知政矣讓不失禮夏楚子秦人侵鄭五月至于城麇鄭皇頡戍之出與楚師戰敗

穿封戌囚皇頡楚人以皇頡歸印董父與皇頡戌城麋

楚人囚之以獻於秦鄭人取貨於印氏以請之子大叔

為令正以為請子產曰不獲

謂大叔辭以貨請董父必不得

受楚之功

而取貨於鄭不可謂國秦不其然若曰拜君之勤鄭國

微君之惠楚師其猶在敝邑之城下其可弗從遂行秦

人不予更幣從子產而後獲之

更遣使執幣用子產之辭乃得董父

秋

七月鄭伯如晉叔向曰鄭七穆罕氏其後亡者也子展

儉而壹

鄭伯歸自晉使子西如晉聘辭曰寡君來煩

執事懼不免於戾使夏子謝不敏君子曰善事大國

冬十月楚子伐鄭鄭人將禦之子產曰晉楚將平諸侯

將和

在明年

楚王是故昧於一來不如使逞而歸乃易成

也夫小人之性釁於勇嗇於禍以足其性而求名焉者

釁動也
嗇貪也

非國家之利也若何從之子展說不禦寇十二

月乙酉入南里墮其城涉於樂氏

津名

門于師之梁

鄭城門

縣門發獲九人焉涉于汜而歸

傳二十七年秋七月鄭伯享趙孟于垂隴

自盟宋還過鄭

子展

伯有子西子產子大叔二子石從

印段公孫段

趙孟曰七子

從君以寵武也請皆賦以卒君貺武亦以觀七子之志

子展賦草蟲

未見君子憂心忡忡

趙孟曰善哉民之主也抑武也

不足以當之伯有賦鷦之賁賁

刺君混亂

趙孟曰牀第之言

不踰閭況在野乎非使人之所得聞也子西賦黍苗之

四章

肅肅謝功召伯營之

趙孟曰寡君在武何能焉子產賦隰桑

思見君子盡心以事之

趙孟曰武請受其卒章

心乎愛矣

子大叔賦野

有蔓草

邂逅相遇適我願兮

趙孟曰吾子之惠也印段賦蟋蟀

無以

大趙孟曰善哉保家之主也吾有望矣公孫段賦桑扈

君子有禮文

趙孟曰匪交匪敖福將焉往

此桑扈詩卒章

若保是言

也欲辭福祿得乎卒享文子告叔向曰伯有將為戮矣詩以言志志誣其上而公怨之以為賓榮其能久乎幸而後亡叔向曰然已侈所謂不及五稔者夫子之謂矣文子曰其餘皆數世之主也子展其後亡者也在上不忘降印氏其次也樂而不荒樂以安民不淫以使之後亡不亦可乎

傳二十八年春無水梓慎曰今茲宋鄭其饑乎

詳見天文書

蔡侯之如晉也

在此年夏

鄭伯使游吉如楚及漢楚人還之

曰宋之盟

宋之盟晉楚之從交相見事見宋

君實親辱今吾子來寡君

謂吾子姑還吾將使驛奔問諸晉而以告子大叔曰宋之盟君命將利小國而亦使安定其社稷鎮撫其民人以禮承天之休此君之憲令而小國之望也寡君是故使吉奉其皮幣以歲之不易聘於下執事今執事有命曰女何與政令之有必使而君弃而封守跋涉山川蒙

犯霜露以逞君心小國將君是望敢不唯命是聽無乃
非盟載之言以闕君德而執事有不利焉小國是懼不
然其何勞之敢憚子大叔歸復命九月鄭游吉如晉

告將朝于楚以從宋之盟子產相鄭伯以如楚舍不為

壇外僕言曰

外僕掌
次舍者

昔先大夫相先君適四國未嘗不

為壇自是至今亦皆循之今子草舍無乃不可乎子產
曰大適小則為壇小適大苟舍而已焉用壇僑聞之大
適小有五美宥其罪戾赦其過失救其菑患賞其德刑

教其不及小國不困懷服如歸是故作壇以昭其功宣
告後人無怠於德小適大有五惡說其罪戾請其不足
行其政事共其職貢從其時命不然則重其幣帛以賀
其福而弔其凶皆小國之禍也焉用作壇以昭其禍所
以告子孫無昭禍焉可也 冬十二月公如楚過鄭鄭
伯不在已在楚伯有迂勞於黃崖不敬穆叔曰伯有無戾
於鄭鄭必有大咎敬民之主也而棄之何以承守鄭人
不討必受其辜濟澤之阿行潦之蘋藻寘諸宗室季蘭

尸之敬也敬可棄乎

傳二十九年夏五月鄭子展卒子皮即位

代父為上卿

於是

鄭饑而未及麥民病子皮以子展之命饑國人粟尸一

鍾是以得鄭國之民故罕氏常掌國政以為上卿宋司城子罕聞之曰鄰於善民之望也 六月吳季札聘於

鄭見子產如舊相識與之縞帶子產獻紵衣焉謂子產

曰鄭之執政侈難將至矣政必及子子為政慎之以禮

不然鄭國將敗 冬十一月鄭伯有使公孫黑子如楚

辭曰楚鄭方惡而使余往是殺余也伯有曰世行也

世為

人子皙曰可則往難則已何世之有伯有將強使之子

皙怒將伐伯有氏大夫和之十二月己巳鄭大夫盟於

伯有氏裨諶曰是盟也其與幾何詩曰君子屢盟亂是

用長今是長亂之道也禍未歇也必三年而後能紓然

明曰政將焉往裨諶曰善之代不善天命也其焉辟子

產舉不踰等則位班也擇善而舉則世隆也天又除之

奪伯有魄子西即世將焉辟之天禍鄭久矣其必使子

產息之乃猶可以戾

定也

不然將亡矣

經三十年秋七月鄭良霄出奔許自許入于鄭鄭人

殺良霄

傳三十年春正月子產相鄭伯以如晉叔向問鄭國之政焉對曰吾得見與否在此歲也駟良方爭未知所成

駟氏子皙
良氏伯有

若有所成吾得見乃可知也叔向曰不既和

矣乎對曰伯有侈而愎子皙好在人上莫能相下也雖其和也猶相積惡也惡至無日矣夏四月己亥鄭伯及

其大夫盟

馬良
爭故

君子是以知鄭難之不已也

六月鄭

子產如陳涖盟歸復命告大夫曰陳亡國也不過十

年矣

詳見
陳

秋七月鄭伯有耆酒為窟室而夜飲酒擊鍾

焉朝至未已朝者曰公焉在

家臣故謂
伯有為公

其人曰吾公在

壑谷皆自朝布路

分

而罷既而朝

伯有朝
鄭君

則又將使子

皙如楚歸而飲酒庚子子皙以駟氏之甲伐而焚之伯

有奔雍梁醒而後知之遂奔許大夫聚謀子皮曰仲虺

之志云亂者取之亡者侮之推亡固存國之利也罕駟

豐同生

同母兄弟

伯有汰侈故不免人謂子產就直助彊子

產曰豈為我徒

言不以馮良為黨

國之禍難誰知所敝或主彊

直難乃不生姑成吾所辛丑子產斂伯有氏之死者而殯之不及謀而遂行印段從之

義子產

子皮止之衆曰人

不我順何止焉子皮曰夫子禮於死者況生者乎遂自止之壬寅子產入癸卯子石入皆受盟于子皙氏乙巳鄭伯及其大夫盟于大宮盟國人于師之梁之外伯有聞鄭人之盟已也怒聞子皮之甲不與攻已也喜曰子

皮與我矣癸丑晨自墓門之瀆入因馬師頡介于襄庫

以伐舊北門駟帶率國人以伐之

之子西

皆召子產

駟氏伯有

俱召子產曰兄弟而及此吾從天所與伯有死於羊肆子

產祿之枕之股而哭之歛而殯諸伯有之臣在市側者

既而葬諸斗城子駟氏欲攻子產子皮怒之曰禮國之

幹也殺有禮禍莫大焉乃止於是游吉如晉還聞難不

入復命于介八月甲子奔晉駟帶

子

追之及酸棗與子

上盟用兩珪質于河使公孫盱入盟大夫已已復歸

游吉

歸書曰鄭人殺良霄不稱大夫言自外入也 於子蟜

之卒也

公孫蠆卒在十九年

將葬公孫揮與裨竈晨會事焉過伯

有氏其門上生莠子羽

公孫揮

曰其莠猶在乎

以莠喻伯有

於

是歲在降婁降婁中而且

奎婁

裨竈指之曰猶可以終歲

歲星十二年而一終

歲不及此次也已

不及降婁

及其亡也歲在姬子

姬子

切訾之口

姬訾營室東壁二十八年歲星淫在玄枵今三十年在姬訾是歲星停

在玄枵二年其

明年乃及降婁僕展從伯有與之皆死羽頡出奔晉為

任大夫雞澤之會

在三

鄭樂成奔楚適晉羽頡因之與

之比而事趙文子言伐鄭之說焉以宋之盟故不可

宋盟

約弭兵故

子皮以公孫鉏

子罕

為馬師

冬十月鄭子皮授

子產政辭曰國小而偪族大寵多不可為也子皮曰虎

帥以聽誰敢犯子子善相之國無小小能事大國乃寬

子產為政有事伯石

公孫段有事欲使之

賂與之邑子大叔曰國

皆其國也奚獨賂焉子產曰無欲實難皆得其欲以從

其事而要其成非我有成其在人乎何愛於邑邑將焉

往子大叔曰若四國何

恐為四鄰所笑

子產曰非相違也而相

從也四國何尤焉鄭書有之

鄭國史書

曰安定國家必大焉

先

先和大族而後國家安

姑先安大以待其所歸既伯石懼而歸

邑卒與之伯有既死使大史命伯石為卿辭大史退則

請命焉復命之又辭如是三乃受策入拜子產是以惡

其為人也

惡其虛飾

使次已位

畏其作亂

晁補之曰以子產之賢察伯石之偽而惡之可以

廢矣顧乃寵之使次已位何也以謂廢之則力未

可為若恥與同列而已自去耶則鄭不可以無子

產故寧少假焉且與之偕而不自去為鄭國慮故也嗚呼君子之馭小人有道抑孔子所謂人而不仁疾之已甚亂也子產其懼此也

子產使都鄙有章上下有服田有封洫廬井有伍大人之忠儉者

謂卿大夫

從而與之泰侈者因而斃之豐卷將祭

請田焉弗許

田獵也

曰唯君用鮮

野獸

衆給而已子張

豐卷

怒

退而徵役

召兵欲攻子產

子產奔晉子皮止之而逐豐卷豐卷

奔晉子產請其田里

請于公不役入

三年而復之反其田里及

其入焉

田里所入

從政一年與人誦之曰取我衣冠而褚之

取我田疇而伍之孰殺子產吾其與之及三年又誦之

曰我有子弟子產誨之我有田疇子產殖之子產而死

誰其嗣之

傳三十一年公薨之月

是年六月魯襄公薨

子產相鄭伯以如晉

晉侯以我喪故未之見也子產使盡壞其館之垣而納

車馬焉士文伯讓之曰敝邑以刑政之不修寇盜充斥

無若諸侯之屬辱在寡君者何是以令吏人完客所館

高其閭閻厚其墻垣以無憂客使今吾子壞之雖從者
能戒其若異客何以敝邑之為盟主繕完葺牆以待賓
客若皆毀之其何以共命寡君使勾請命

士文伯

對曰以

敝邑褊小介於大國誅求無時是以不敢寧居悉索敝
賦以來會時事逢執事之不間而未得見

賢遍反下同

又不

獲聞命未知見時不敢輸幣亦不敢暴露其輸之則君
之府實也非薦陳之不敢輸也其暴露之則恐燥濕之
不時而朽蠹以重敝邑之罪僑聞文公之為盟主也宮

室卑庠無觀臺榭以崇大諸侯之館館如公寢庫廩繕

修司空以時平易道路巧人以時填館宮室

填塗也莫歷反

諸

侯賓至旬設庭燎僕人巡宮車馬有所賓從有代巾車

脂轄隸人牧圉各瞻其事百官之屬各展其物公不留

賓而亦無廢事憂樂同之事則巡之教其不知而恤其

不足賓至如歸無寧菑患不畏寇盜而亦不患燥濕今

銅鞮之宮數里而諸侯舍於隸人門不容車而不可踰

越盜賊公行而天厲不戒賓見無時命不可知若又勿

壞是無所藏幣以重罪也敢請執事將何所命之雖君

之有魯喪亦敝邑之憂也

鄭魯同姓

若獲薦幣修垣而行君

之惠也敢憚勤勞文伯復命趙文子曰信我實不德而

以隸人之垣以羸

受也

諸侯是吾罪也使士文伯謝不敏

焉晉侯見鄭伯有加禮厚其宴好而歸之乃築諸侯之

館叔向曰辭之不可已也如是夫子產有辭諸侯賴之

若之何其釋辭也詩曰辭之輯矣民之協矣辭之繹矣

民之莫矣其知之矣

鄭子皮使印段如楚以適晉告

禮也 十二月北宮文子相衛襄公以如楚過鄭印段

廷

子放切
往也

勞于棐林如聘禮而以勞辭文子入聘子羽

為行人馮簡子與子大叔逆客事畢而出言於衛侯曰

鄭有禮其數世之福也其無大國之討乎子產之從政

也擇能而使之馮簡子能斷大事子大叔美秀而文公

孫揮能知四國之為而辨於其大夫之族姓班位貴賤

能否而又善為辭令裨諶能謀謀於野則獲謀於邑則

否鄭國將有諸侯之事子產乃問四國之為於子羽且

使多為辭令與裨諶乘以適野使謀可否而告馮簡子
使斷之事成乃授子大叔傳使行之以應對賓客是
以鮮有敗事北宮文子所謂有禮也 鄭人遊於鄉

校以論執政然明謂子產曰毀鄉校何如子產曰何
謂夫人朝夕退而游焉以議執政之善否其所善者
吾則行之其所惡者吾則改之是吾師也若之何毀
之我聞忠善以損怨不聞作威以防怨豈不遽止然
猶防川大決所犯傷人必多吾不克救也不如小決

使道不如吾聞而藥之也。然明日蔑也。今而後知吾子之信可事也。小人實不才。若果行此。其鄭國實賴之。豈唯二三臣仲尼聞是語也。曰以是觀之人。謂子產不仁。吾不信也。子皮欲使尹何為邑。子產曰。少未知可否。子皮曰。愿吾愛之不吾叛也。使夫往而學焉。夫亦愈知治矣。子產曰。不可。人之愛人。求利之也。今吾子愛人。則以政猶未能操刀而使割也。其傷實多。子之愛人。傷之而已。其誰敢求愛於子。子於鄭國棟也。棟折榱崩。僞將

厭焉敢不盡言子有美錦不使人學製焉大官大邑身之所庇也而使學者製焉其為美錦不亦多乎僑聞學而後入政未聞以政學者也若果行此必有所害譬如

田獵射御貫

有患切

則能獲禽若未嘗登車射御則敗績

厭覆是懼何暇思獲子皮曰善哉虎不敏吾聞君子務知大者遠者小人務知小者近者我小人也衣服附在吾身我知而慎之大官大邑所以庇身也我遠而慢之微子之言吾不知也他日我曰子為鄭國我為吾家以

庇焉其可也今而後知不足自今請雖吾家聽子而行
子產曰人心之不同如其面焉吾豈敢謂子面如吾面
乎抑心所謂危亦以告也子皮以為忠故委政焉子產
是以能為鄭國

昭公經元年春叔孫豹會晉趙武楚公子圍齊國弱宋
向戌衛齊惡陳公子招蔡公孫歸生鄭罕虎許人曹人
于虢

傳元年春楚公子圍聘于鄭且娶於公孫段氏伍舉為

介將入館鄭人惡之使行人子羽與之言乃館於外既
聘將以衆逆子產患之使子羽辭曰以敝邑褊小不足
以容從者請墀聽命令尹命大宰伯州犂對曰君辱貺
寡大夫圍謂圍將使豐氏撫有而室圍布几筵告於莊
共之廟而來若野賜之是委君貺於草莽也是寡大夫
不得列於諸卿也不寧唯是又使圍蒙其先君將不得
為寡君老其蔑以復矣唯大夫圖之子羽曰小國無罪
恃實其罪將恃大國之安靖已而無乃包藏禍心以圖

之小國失恃而懲諸侯使莫不憾者距違君命而有所
壅塞不行是懼不然敝邑館人之屬也其敢愛豐氏之
祧伍舉知其有備也請垂橐而入許之正月乙未入逆
而出遂會於虢尋宋之盟也 鄭徐吾犯之妹美公孫

楚南聘之矣公孫黑

子哲

又使強委禽焉

禽鴈

犯懼告子產

子產曰是國無政非子之患也唯所欲與犯請於二子
請使女擇焉皆許之子哲盛飾入布幣而出子南戎服
入左右射超乘而出女自房觀之曰子哲信美矣抑子

南夫也

言丈夫

夫夫婦婦所謂順也適子南氏子皙怒既

而橐甲以見子南欲殺之而取其妻子南知之執戈逐

之及衝擊之以戈子皙傷而歸告大夫曰我好見之不

知其有異志也故傷大夫皆謀之子產曰直鈞幼賤有

罪罪在楚也

先聘子南直子南用戈子皙直子產未能討歸罪於楚

乃執子南而

數之曰國之大節有五女皆奸之畏君之威聽其政尊

其貴事其長養其親五者所以為國也今君在國女用

兵焉不畏威也奸國之紀不聽政也子皙上大夫女嬖

大夫而弗下之不尊貴也幼而不忌不事長也兵其從
兄不養親也君曰余不女忍殺宥女以遠勉速行乎無
重而罪五月庚辰鄭放游楚於吳將行子南子產咨於
大叔大叔曰吉不能亢身焉能亢宗

亢蔽也

彼國政也非

私難也子圖鄭國利則行之又何疑焉周公殺管叔而

蔡蔡叔

蔡放也

夫豈不愛王室故也吉若獲戾子將行之

何有於諸游鄭為游楚亂故南六月丁巳鄭伯及其

大夫盟於公孫段氏罕虎公孫段印段游吉四帶私盟

于閨門之外實薰隧公孫黑彊與於盟使大史書其名

且曰七子

自欲同於六卿

子產弗討

晉侯有疾鄭伯使公孫

僑如晉聘

詳見晉

經二年秋鄭殺其大夫公孫黑

傳二年秋鄭公孫黑將作亂欲去游氏

大叔之族

而代其位

傷疾作而不果駟氏

黑氏之族

與諸大夫欲殺之子產在鄙

聞之懼弗及乘遽而至

遽傳驛

使吏數之曰伯有之亂

在襄

二十一年

以大國之事而未爾討也爾有亂心無厭國不女

堪專伐伯有而罪一也昆弟爭室而罪二也

爭徐吾犯妹

薰

隧之盟女矯君位而罪三也

使大史書七子

有死罪三何以堪

之不速死大刑將至再拜稽首辭曰死在朝夕無助天

為虐子產曰人誰不死凶人不終命也作凶事為凶人

不助天其助凶人乎請以印為褚師

印子皙子褚師市官

子產曰

印也若才君將任之不才將朝夕從女女罪之不恤而

又何請焉不速死司寇將至七月壬寅縊尸諸周氏之

衢加木焉

書其罪於木加尸上

十一月鄭印段如晉弔

晁補之曰子產為鄭叔向為晉晏嬰為齊皆三國
季世而晉齊甚焉初子皮授子產政辭曰國小而
偏族大寵多不可為也及為政有事伯石賂與之
邑子大叔曰國皆其國也奚獨賂焉子產曰無欲
實難卒與之夫為政而令不行於公族至有所欲
使而用賂國於何有哉然子產所以為此抑可言
矣子南子皙之爭子南直也若罪其用戈則子皙
先橐甲往殺子南子南用戈但應之也而曰直鈞

幼賤有罪罪在子南雖後子皙強與於盟亦弗即
討則其忍可知矣及子皙獲罪然後方數以大國
之事未爾討而摘其昆弟爭室至此則皙之直安
在哉乘遽而至迫以縊死則子產本心可見矣惟
初忍而後決始逆而終伸事定國靖而衆方知其
心是乃子產所以為賢而稱於孔子也昭三年齊
侯使晏嬰請繼室於晉叔向從之宴相與語曰齊
其何如晏子曰此季世也吾弗知齊其為陳氏矣

叔向曰然雖吾公室亦季世也政在家門民無所
依夫以鄭晉齊三國有臣若是然至世微政去皆
不能救鄭未裂於疆臣子產猶因事正之晉齊將
亡賢如叔向平仲特相與私語而太息豈不哀哉
傳三年春王正月鄭游吉如晉送少姜之葬

詳見晉

夏

四月鄭伯如晉公孫段相甚敬而卑禮無違者晉侯

公平

嘉焉授之以策曰子豐

段之父

有勞於晉國余聞而弗忘

賜女州田以胙乃舊勲伯石再拜稽首受策以出君子

曰禮其人之急也乎伯石之汰也一為禮於晉猶荷其祿況以禮終始乎詩曰人而無禮胡不遄死其是之謂乎秋七月鄭罕虎如晉賀夫人

晉逆齊女

且告曰楚人曰

徵敝邑以不朝立王之故

楚靈新立

敝邑之往則畏執事其

謂寡君而固有外心其不往則宋之盟云

云交相見

進退罪

也寡君使虎布之宣子使叔向對曰君若辱有寡君在楚何害修宋盟也君苟思盟寡君乃知免於戾矣君若

不有寡君雖朝夕辱於敝邑寡君猜焉君實有心何辱

命焉君其往也苟有寡君在楚猶在晉也 冬十月鄭

伯如楚子產相楚子享之賦吉日

宣王田獵詩楚王欲與鄭伯共田故既

享子產乃具田備王以田江南之夢

雲夢

傳四年秋九月鄭子產作丘賦

丘十六井當出馬一尺牛三頭今子產別賦

國人謗之曰其父死於路

謂子國為尉氏所殺

已為蠆尾

謂重賦毒百姓

以令於國國將若之何子寬以告子產曰何害苟利社

稷死生以之且吾聞為善者不改其度故能有濟也民

不可逞度不可改詩曰禮義不愆何恤於人言

逸吾不詩

遷矣渾罕

子寬

曰國氏其先亡乎君子作法於涼

也薄

其敵

猶貪作法於貪敵將若之何姬在列者

在列國

蔡及曹滕

其先亡乎偪而無禮

蔡偪楚曹滕偪宋

鄭先衛亡偪而無法政不

率法而制於心民各有心何上之有

傳五年春鄭罕虎如齊娶於子尾氏晏子驟見之陳桓

子問其故對曰能用善人民之主也

謂授子產政

傳六年春三月鄭人鑄刑書叔向使詒子產書曰始吾

有虞於子

虞度

今則已矣昔先王議事以制不為刑辟懼

民之有爭心也猶不可禁禦是故閑之以義糾之以政
行之以禮守之以信奉之以仁制為祿位以勸其從嚴
斷刑罰以威其淫懼其未也故誨之以忠聳之以行教
之以務使之以和臨之以敬泣之以彊斷之以剛猶求
聖哲之上明察之官忠信之長慈惠之師民於是乎可
任使也而不生禍亂民知有辟則不忌於上並有爭心
以徵於書而徵幸以成之弗可為矣夏有亂政而作禹
刑商有亂政而作湯刑周有亂政而作九刑三辟之興

皆叔世也今吾子相鄭國作封洫

襄三
十年

立謗政

作丘賦
在四年

制叅辟鑄刑書將以靖民不亦難乎詩曰儀式刑文王

之德曰靖四方

我將

又曰儀刑文王萬邦作孚

王又

如是

何辟之有民知爭端矣將弃禮而徵於書錐刀之末將盡
爭之亂獄滋豐賄賂並行終子之世鄭其敗乎矜聞之

國將亡必多制其此之謂乎復書曰若吾子之言僑不

才不能及子孫吾以救世也既不承命敢忘大惠

以見
歲戒

為士文伯曰火見鄭其火乎

火心星周
五月昏見

火未出而作火

以鑄刑器藏爭辟焉火如象之不火何為夏六月丙戌

鄭災 楚公子棄疾如晉報韓子也過鄭鄭罕虎公孫

僑游吉從鄭伯以勞諸祖

詳見楚

傳七年夏鄭子產聘于晉

詳見晉

鄭人相驚以伯有曰

伯有至矣則皆走不知所往

襄三十年鄭殺伯有

鑄刑書之歲二

月

在前年

或夢伯有介而行

甲冑

曰壬子余將殺帶也

六年三月

日明年壬寅余又將殺段也

此年正月二十八日

及壬子駟帶卒

國人益懼齊燕平之月

新注此年正月當作齊魯平之月詳見內魯曰燕誤也

壬

寅公孫段卒國人愈懼其明月子產立公孫洩

子孔子襄十九

年殺子孔

及良止

伯有子

以撫之乃止子大叔問其故子產曰

鬼有所歸乃不為厲吾為之歸也大叔曰公孫洩何為

子孔不為厲何為復立洩

子產曰說也為身無義而圖說

伯有無義以妖鬼故

立從政有所反之以取媚也不媚不信不信民不從也

及子產適晉趙景子問焉伯有猶能為鬼乎子產曰能
人生始化曰魄既生魄陽曰魂用物精多則魂魄彊是
以有精爽至於神明匹夫匹婦彊死其魂魄猶能馮依

於人以為淫厲況良霄我先君穆公之冑子良之孫子耳之子敝邑之卿從政三世矣鄭雖無腆抑諺曰蕞爾國而三世執其政柄其用物也弘矣其取精也多矣其族又大所馮厚矣而強死能為鬼不亦宜乎子皮之族飲酒無度故馬師氏與子皮氏有惡齊師還自燕之月

此年二月

罕朔殺罕魍

子皮弟

罕朔奔晉韓宣子問其位於子

產子產曰君之羈臣苟得容以逃死何位之敢擇卿違

從大夫之位

以禮去者降位一等

罪人以其罪降

罪重降多

古之制也

朔於敝邑亞大夫也其官馬師也獲戾而逃唯執政所
寘之得免其死為惠大矣又敢求位宣子為子產之敏
也使從嬖大夫

傳十年秋七月戊子晉平公卒鄭伯如晉及河晉人辭
之游吉遂如晉九月罕虎如晉葬平公也鄭子皮將以

幣行

見新君贊

子產曰喪焉用幣用幣必百兩

載幣用車百乘

百兩

必千人千人至將不行不行必盡用之

不得見新君將自費用盡

幾

千人而國不亡子皮固請以行既葬諸侯之大夫欲因

見新君叔孫昭子曰非禮也弗聽叔向辭之曰大夫之

事畢矣

既葬禮畢

而又命孤孤斬焉在衰經之中

既葬未卒哭故稱服

衰斬其以嘉服見則喪禮未畢其以喪服見是重受弔也

大夫將若之何皆無辭以見子皮盡用其幣歸謂子羽曰非知之實難將在行之夫子知之矣我則不足書曰欲敗度縱敗禮我之謂矣夫子知度與禮矣我實縱欲而不能自克也

經十有二年春三月壬申鄭伯嘉卒夏五月葬鄭簡

公三月而

葬速

傳十二年春三月鄭簡公卒將為葬除

葬道

及游氏之廟

子大將毀焉子大叔使其除徒執用以立而無庸毀曰

叔族

子產過女而問何故不毀乃曰不忍廟也諸將毀矣

教毀

廟者既如是子產乃使辟之司墓之室有當道者毀之

之辭

則朝而壙

壙下棺
北鄧切

弗毀則日中而壙子大叔請毀之曰

無若諸侯之賓何子產曰諸侯之賓能來會吾喪豈憚日中無損於賓而民不害何故不為遂弗毀日中而葬

君子謂子產於是乎知禮禮無毀人以自成也 夏鄭

伯如晉朝嗣君也

晉昭新立

晉侯享諸侯子產相鄭伯辭於

享請免喪而後聽命晉人許之禮也

新注諸侯在喪皆稱子簡公未葬而

言鄭伯亦見制度漸變

六月葬鄭簡公

春秋分記卷六十九